

MARA EVANGELICAL CHURCH



CHAKAONA BU

2021

Copy Right @ 2021 by
Mara Evangelical Church

Cover Design & Format
Rev. Pa Hmo (*Alpha & Omega*)

Copy
500

Published by
Mara Evangelical Church
Headquarters: Lailenpi/Sabawngpi
Matuhipi Township, Chin State
Myanmar

ACHHÔH BIEZY

Biehmiapa	...	<i>i</i>
1. Achhyna Chhihthana	...	1
2. Hâta chhôh Apakhyna zy	...	5
3. Kô Thiehpa & Daihti eihpa zy	...	6
4. Saw Hlâna	...	11
5. Mebâh Thiehpa Aly Pangiana	...	15
6. Chhoreipazy Apy Heihna	...	17
7. Athipa Ri Chakaona	...	20
8. Bâtina Pachuna	...	25
9. Bâti Pachâsana	...	33
10. Bâti Thiehpany Akaona liata Alyna	...	41
11. ABeipa Zâpati	...	43
12. Dyhchâ Kupatu Tlâh-awna	...	50
13. Nôvah Pathaihpa Kupatusana	...	52
14. Paryhpazy Kupatusana	...	61
15. Department Chhituhpazy Hlâna	...	65
16. Khichhôn Machâ Pa-ina	...	68
17. Awnanopa Machâ Chahnaona	...	72
18. Evangelist Pa-ina	...	82
19. Mission Pastor Chahnaona	...	89
20. Probationary Pastor Pa-ina	...	99
21. Pastor Chahnaona	...	106
22. Otôh Bô Thlahchhâna	...	117

23.	O Thiehpa Hlâna / Pahyna	...	119
24.	Achhyna-o Hlâna / Pahyna	...	121
25.	Awnanopa Bie Ngiapâpazy	...	125
26.	Awnanopa Bie Zyhpazy	...	131
27.	Awnanopa Hro Avaona Ryhpa	...	137

BIEHMIAPA

Awnanopa cha Krista pôhpa a châ. Chavâta khizaw liata awnanopa a y chhôn ta a chakaona nata siena awpa zie cha Krista pachuna hawhta a châ lymâ aw.

Mara Awnanopa Chakaona Châbu he eima Missionary-zy nata Awnanopa nôpaw hmiatuapazy ta Church of South India, Presbyterian Church of India, Baptist Church of Mizoram chakaona buzy mopazipa ta ama vaw patohpatiapa a châ. Mara Awnanopa duahmo nata âhmie via thei nawpa ta ei hluphi ama mopasiapa khai tawhta atahmâ he Sixth Edition ta papuapa a châ.

1st – 3rd Edition (Missionary zy taopa)

4th Revised Edition (1986)

5th Edition (2010)

6th Revised Edition (2021)

Mara Awnanopa he khizaw kaoki liata ama y hawpa vâta nata Mission Field liata a ypa eima Awnanopazy duahmo mopâpa ta he Chakaona Bu (6th Revised Edition) he pachhauhpanohpa a châ. Chakaona Bu liata hawhrawh nata a bie siezie chhao Khazohpa bie siezie (theology) dopa nata Mara Awnanopa Dâh nata Ryhpazy saina chô ta, a chhônbiezy paryhpa a châ. Awnanopa liata

chakaona siezie âlyu via lymâ thei nawpa ta, parôkarâ âpazipa ta sopa a châ. Anodeikua cha Missionary-zy ta ama vaw taopa Mara Awnanopa ngiapana nata taozie cha pabohsapa ta chhy lymâpa a châ.

6th Revised Edition liata Chakaona mia (5) tlai baichhapa a châ. Chazy cha:

1. Mebâh thiehpazy aly pangiana
2. Otôh bô thlahchhâna
3. O thiehpa Hlâna/pahyna
4. Department Chhihtuhpazy Hlâna
5. Mission Pastor chahnaona

Khazohpa cha Thlahpa châ ta, âchhytuhpazy ta Thlahpa nata hmeihseihpa ta ano achhyh ta eima chakao thei nawpa ta, he Chakaona Bu he ABeipa ta byhnâ pie mawh sy! Amen.

Rev. Dr. L. B. Siama
General Secretary

BO – 1

ACHHYNA CHHIHTHANA

Khazohpa achhy awpa ta apakhyna chhihthanazie kao no a y. Sâkhana cha tao chiehpa ropa hmâpa ta achhyna châ ta, a sânona deikua châ achhytuhpazy palôhru hmâpa ta chhihthana a châ. A sânona he eima Awnanopa ta eima hmâpa a châ. Pakhyna liata athaona tawhta achhâna taihta â chhytuhpazy pi ta, Khazohpa hrohpa âchhupa eima châzie palâsa cheingei awpa a châ.

Apakhyna siezie

Mara Awnanopa ta apakhyna chhihthana he tlokhuh âlyu thei leipa chhao ta, atlâhpipe cha âlyu awpa a châ. He hawhta achhyna chhihtha awpa a châ aw.

1. Achhy awpa ta Hruana (Call to worship)
Biehrâi reina, Thlahchhâna.
2. Reithaina ta achhyna (Praise & Worship)
tlyma, Zawpi aduapa ta Reithaina Hlasana
tlyma hnei awpa.
3. Pastor tlyma, Hyutuhpa tlyma tawhta anaohna
(Greetings).

4. Bie Pahnosana (Biephuahna)
5. Piena ta ABeipa Achhyna (Sôh kheina)
Sôh khei no ta zawpi hlasana a y aw.
6. Sôh Hlâna
Sôh khei khai ta zawpi aduapa ta "Khazohpa byhnâ pietuhpa" tahpa sâ awpa châ aw ta, sôh hlâtuha ta maisâh tawhta sôh a hlâ aw.
7. Hlapy, sôlô (soloist), achâhkheina ... hpz.
8. Vaituhpa Thlahchhana
Pastor tlyma, Hyutuhpa tlyma, Local thatih a pahnopa ta Maisâh tawhta thlahchhâ aw ta, achhâna liata Bei Zisu thlahchhâna ahly awpa.
9. Zawpi aduapa ta Reithaina Hlasana
10. Biereituhpa ta âtlypa Biehrai Reina
Biereituhpa tlyma, raopa pakha kha tlyma, a reih aw.
11. Khazohpa Bie Phuahna (Sermon)
Maisâh tawhta Sermon a reih aw.
12. Zawpi aduapa ta reithaina hlasana.
13. Pastor ta byhnâ awna.
Pastor y leina liata cha biereituhpa tlyma, rao chiehpa pakha kha thlahchhâna tlyma, Bei Zisu Thlahchhâna ta tlyma reipa a châ aw.
14. Threefold Amen.
Abeipano my supi apakhyna liata byhnâ awna hnei khai tawhta Amen ei (3) hlâ ta sa awpa.

Pahno awpazy

1. Pakhyna chhituhpa cha daihti avaotuh chaipa a châpa vâta hawh awpa châ vei. A thei lei no ta chhao a vyuhpa a rao chhili awpa a châ. Apakhy chhôhta tao awpa zydua châ ta roh khai hâ sala, chhithapa awpa a châ. Apakhyna chhituhpa cha Khazohpa bie a rei pakawh awpa châ vei.
2. Achhy awpa ta hruana (call to worship) liata Chhituhpa ta Khazohpa bie bo nata châh a khopa tlyma, chakaona bu liata palasapazy hry liata sâkha kha tlyma ahmâ tita ‘bo nata châhzy nahthlie suh vy’ tahpa nata ‘ABeipa ta byhnâ pie mawh sy!’ tahpazy rei lei awpa a châ. Achhyna liata bie hmâpa cha a pasi awpa châ vei.
3. Biereituhpa cha Khazohpa bietapa Awnanopazy lâta areituhpa a châpa vâta, pakhâ tata, tlahchhâna chôta â pachhuahtpanoh awpa a châ. Pakhyna chhituhpa hnoh ta, hla â tlypazy a pahnosa ha awpa a châ.
4. Biereituhpa nata pathaotuhpazy ta Khazohpa châbu ama rei chy ta, ‘Khazohpa bie nahthlie suh vy’ tah tuapa ta, bo nata châh sia ngaitapa ta ei no reipa a pha. Rei awpazy rei khai tawhta

“A bie pathaihpa Khazohpa ta byhnâ pie mawh sy! “Amen,” tah lymâ awpa a châ.

5. Hla atlyna kyh liata ‘Khazohpa achhy nawpa ta Krizyhpâ Hlabu Nuhby ()na, eima sa aw’ tah awpa a châ.
6. Thlahchhâ chy ta, ‘Thlahchhâ suh vy’ tlyma, ‘Thlachhâ sila, ABeipa Thlahchhâna eima pazao aw’ tlyma tah awpa a châ.
7. Zawpizy cha Local Standing Committee ta atyuna su a raopa liata amâ tyuh awpa a châ.
8. Achhyna o liata apakhyna chhithatuh awpazy cha pastor zy, Awnanopa Machâzy nata Khichhôn Machâzy ama châ aw.

BO – 2

HÂTA CHHÔH APAKHNAZY

Abeipano h eima cha y tyhpa chhao he tao chhyhpa châ leipata, Apostôl-zy chhaota ama vaw hmâ tyhpa, eima Beipa Zisu Krista thyuheihna noh a châ. He noh he Khazohpa achhyna nata Sunday School achuna ta hmâ awpa a châ.

Hâta chhoh apakhyna cha Assembly paryhsana hawhta a châ aw. Local Church ta a hneipa apakhynazy cha:

1. Abeipano h my apakhyna
2. Abeipano h zâ apakhyna
3. Pakhy zâ apakhyna
4. Pachyh zâ apakhyna

KTP, KNP, KHP, KPP nata Mission apakhyna noh cha Assembly paryhsana zie hawhta a châ aw. Apakhyna siezie cha Bo. 1na liata palasapa hawhta a châ aw.

BO – 3

KÔ THIEHPA & DAIHTI EIHPAZY

Daihti eihpa apakhyna tahpa cha Assembly ta a hneipa Noh peimawhpazy liata apakhyna tahna a châ. Apakhyna siezie cha Chakaona Bu Bo (1) na liata palâsapa hawhta a châ. Noh Peimawhpa noh liata parôkara eihrahpa (special program) a ypa chhao ta, pakhyina siezie tlahpîpa zi lymâ awpa a châ.

Zâ vai apakhyna (Mid-night worship)

Kô parohpa tawhta kô thiehpa lâta eima ngia hlâta za dawh 11:30-12:00 likawh liata Khazohpa achhyna a y aw. Apakhyna siezie pachâna chô ta, program tao awpa a châ aw. Molei palâhâhna thlahchhâna a y aw. Zâ dawh 12 mopâpa ta bierei awpa a châpa vâta minute 5-10 taihta Khazohpa bie rei awpa a châ aw. Zâ vai apakhyna liata biepipa nata âhmiepa Biehrai bo nah châh atly awpa a châ. Hezy chhao hmâ theipa a châ hra.

ABeipa a hâtuhpazy deikua chata ama thatlôna pathieh aw ei ta, pahmôpi hawhta mathlaw ta a zaw aw ei ta, riethei leipa ta a râ aw ei ta, panao leipa ta phei ta ama sie aw (Is. 40:31).

ABeipa, nâ cha chhâ zydua chhôn ta eima pahrâna na châ tyh. Tlâhzy a y hlâ ta, leilô nata khizaw na padua hlâ chhao khata, chhazaw tawhta chhazaw taih chhaota, nâ cha Khazohpa na châ (Hla. 90:1-2).

Anodeikuacha nâmo nata Byh likawh cha thliepa ta dy sâhno tlyma a châ awpa a châ; a hnia kha u. Chatanachata nama sie awpa lâpi cha nama pahno thei aw, ha hlâta he lâpi he a chhih beih lei khah ei chi ta (Zs. 3:4).

Hla. 37:3-5; 90:12; Phil. 3:13-16; Heb. 12:1-2; 13:14-16 chhao reih awpa a châ.

Kô Thiehpá Apakhyna

Kô Thiehpá noh my apakhyna liata 'Biehrainha pathieh heihna' hmâ tyh awpa a châ. Apakhyna siezie liata Biepahnosana (biephuahpa) hnei khai, Sôhkhei hlâta 'Biehraina Pathiehna Program' hnei awpa a châ aw. Biatuhpa Pastor (pastor) yna liata cha pastor ta chhihtha aw ta, pastor y leina liata cha Hyutuhpa tlyma, Awnanopa Machâ asaomâ viapa pakha kha ta a chhihtha aw. Kô Thiehpá Noh ta Biehraina Pathiehna cha he hawhta hnei awpa a châ aw.

Chhituhpa ta:

Kho chaipa saih u, awpa ta eima châna Krizyhpâ hro he Khazohpa lâta hlâ hawhpa, Krista zawzi ta Ano ta moleina tawhtapa a chatlai hawpa Krista liata hro a châ. Cha hrona liana cha angia haw pi ta, eima Beipa Zisu Krista chata Biehrâi thiehpa, ano thisaih tlaita chahnaopa, chhâzaw ta a y awpa liata maniah a pangia haw.

Khazohpa lâta cha he Biehrâihna he Zisu Krista liata khizaw nata Anosasyh ta âparyh heihna châ ta, Zisu Krista eima ngiapâna taotuhpa nata pakituhpa liata a phuah hawpa cha keimo liata nata keimo hmâpa ta patlô awpa ta bie maniah a taihna a châ. A bietaihpa cha khâ a y tahpa pahno pi ta, a ngiachhiena chhao noh to hro liata eima pahnopasia lymâ.

Keimo lâta cha, he Biehrâihna he angiapâna ta to pi ta, keimo châta hro khao leipa ta, Ano chakao awpa ta maniah aw ta, kyh maniah a pachâpa vâta keimo châta a pie khai hatuhpa châta tlaohroh awpa ta bie liahsa eimâ taihna kyh a châ.

Eimâ hlâna Biehrâihna he pathieh tyhpa châ ta, atanoh he thapha ngaitapa ta nata hmeiseihna kyh ta Khazohpa nata maniah a pazaopa Biehrâihna cha pathieh heih awpa ta eimâ pakhy. Chavânachata Khazohpa zawngiahnazy nata a awna hnabeiseihnazy cha a thei thlahana chôta,

eima pathipalôhzy cha palyupalihna kyh ta Ano lâ pahy ei suh vy.

Khazohpa châ bie pathaihpa nahthlie ei suh u. Zer. 31:31-33; Heb. 12:22-25 rei awpa a châ.

Chhituhpa ta

Kho chaipa saih u, atahmâ Khazohpa ta a zawpizy lâta Biehraina a taopa cha, eima pathipalôh tlokhuh ta pathieh ei sila, Krista raopakypa cha aky ei suh u. Cha yzie cha eima hriana awpazy, eima y nawpa suzy, Ano ta maniah a raona liata eima palôhtlah aw ta, ano deita cha eimâ lyna chaipa a châ aw, tagna a châ.

Krista ta chakaona rai maniah a pahriasa awpa hluhpi hnei ta, thokha cha naota ta, a hropazy cha a ru ngaita kaw, thokha za a chhieh ta, a hropazy cha mohnao â chhieh, thokha cha keimo khozie nata alyu aw ta, a hropazy deikua cha keimo khozie nata â chakhia aw.

Kyh thokha liata Krista palysa pi ta, keimo chhao eimâ ly thei; kyh hropazy liata deikua cha keimosasyh apapha khai hana dei leipata cha Krista palysa thei ma pie. Châhrasala he hmo zydua tao thei nawpa ta hmotaotheina cha tha maniah a patlôtuha Krista liata Khazohpa ta maniah a pie haw. Chavâta Khazohpa Biehraina cha keimo eih ta tao ei sila, eima pathipalôhzy cha

ABeipa pavaosa ei sila, a thatlôna vâta hnôhlâ kua heih khao lei nawpa ta pathlu ei suh u. Atahmâ a bietaihpaзы cha eima pathipalôh tlokhuh ta ngâpa ta, a ngiachhiena liata a pahnieh khaina chôta Khazohpa lâta a thiehpa ta ahlâ awpata eima pakhupahneih chyuh suh vy.

Biehrainna

Chhituhpa ta “Biehrainna” ropa he reih aw ta, zawpi ta ama zi lymâ awpa a châ. Abei Thlahchhâna chhao pazao awpa a châ.

Keima eih châ khao leipa na ta, nâ eih ei châ, na khopa hawhta na paysa la, ei châ nawpa na khopa liata na soh mah y. Hriapasa awpa ta na bao la, ei tovyuh a phapa chhaota, a chhiepa chhaota, nâ châta châ sala, ei rônahpa chhaota, ei nawhpa chhaota, nâ châta châ mawh sy. Ei hneipa chhaota, ei dyhchhiepa chhaota nâ châta châ sala, he khizaw ryhpa hawhta y leipa ta, atheihna hrohpa nata pathaih nata nâ ly tlâh châ awpa ta atahmâ ei pôhpa ei cha hlâ.

Hy! rônahpa nata reithai tlâh Khazohpa, Paw, Sawchapawpa, Thlahpa Pathaih, Keima eih na châ, kei chhao nama eih ei châ. He Biehrainna alei liata ei taopa he, avâ liata chhao châ hra mawh sy! Amen.

Chatawha Apakhyna chhituhpa ku lâta hlâ heih awpa a châ.

BO - 4

SAW HLÂNA

MEC Awnanopa chhoh liata hawsaih a pih thiehpa zydua cha Abeipa lâta hlâ awpa a châ. Hawsaihpa ama hlâ hlâta Pastor/ Hyutuhpa ta hlâ awpa hawti moh, a nô nata paw moh, pho, pi noh reipa ta zawpi la a pahnosa aw. Nô nata paw zy maisâh hmiakô liata hawsaih apyna chôta a duapa ta deichhytuhpa chata he Khazohpa bie he a reih aw.

Sawnawhzy he ABeipa tawhtapa eima ryuto châ ei ta, sathei he a lymâ maniah a piepa cha a châ (Hla. 127:3).

Hawtipa cha a siena awpa lâpi liana chata pachu ula, a machâ tita chhao siesai aw vei (Bis. 22:6).

He chyhsa chyhpatazy hryta pakha chhao he mopakhô leipata a chado teh u, avâ liata ama valyuchâpazy ta ei Paw avâ liatapa hmia cha khâ ama hmô tyh tahpa ei cha chho ei hih (Mt.18:10).

Zisu ta ama hnohta, “Hawti chyhpatazy ei hnohta a vaw chhi ula, dytha kha u, Khazohpa khihnarâh cha he hawhpa chyhsazy eih châ tlôh ta. Hmeiseih tata eih cha chho ei chuh, ahyrai

Khazohpa khihnarâh cha hawti alypa hawhta aly leipa maih cha a ngia chacheita aw vei ei,” tah ta, âmo cha a bâh ta chalo ta, ama chôta ku pazawhpa ta byhnâ awpa ei ta.” (Mk. 10:13-16).

Khazohpa bie rei khai nahta he pasyuna bie he reipa a châ.

Kho chaipa saih u, Khazohpa atotaotheipa chata nama chô liata pha ta, hmosaipa sôh ngaitapa saw a cha pie ei hih. Atahmâ he hawti (zy) cha ABeipa lâta eima hlâ aw. Khazohpa biezy liata hawtitazy ano lâta chhihtha awpa âbyuhzie nata ano ta ama chô liata aly ta, byhnâ a aw, tahpa chhao nama pahno haw.

Chahawna hra chata Zisu Krista ta he hawtitazy âly khoh hra, tahpa a lôh leipa ta y leipa ta, â-ipa ta tiao a ngiapâ muh vy.

Chakaotuhpa ta alyna bie reina thlahchhâna a hnei khai tawhta nôpawzy lâta bie hiahripa a châ aw.

Chakaotuhpa

Nâmo nôpaw saih u, he hawti (zy) he Zisu Krista cha ano (âmo) Beipa nata Pachhatuhpa a châ, tahpa a (ama) pahno thei nawpata, Krista

ngiapâna kyh lâpi dopazy, a siana kyh zy nata a biepiepa pathaihna kyh zy cha hrozie ta hnei ta, pachu lyma awpa ta, atahma he hawti (zy) moh ta bie liahsa nama taihmâ?

Nôpawzy: Bie liahsa eimâ taih.

Hlâna

Chakaotuhpa ta hawti a pyh aw ta, maisâh la kiah aw ta, a luh liata ku pahniehna chôta he biezy a reih aw:

Moh :, na nô nata na pawzy ta Khazohpa mohmô nata he apakhypenawh hmiakô liata bie liahsa amâ taihpa hawhta, atahmâ eima Beipa Zisu Krista Mietakupa sahlao hry liata ei cha pahlao. Khazohpa ta ano chyhsa ngâchhihpa châ awpata cha hrôbieh sala, byhnâ cha pie mawh sy, Amen.

Thlahchhâna

Hawsaih hlâ khai tawhta Chakaotuhpa ta ano khozie hawhta thlahchhâna tlyma, a ry liata Byhnâ awna ta tlyma a hnei aw.

Byhnâ Awna

ABEIPA ta byhnâ cha awpa ei sala, cha vaih lymâ ei se. ABEIPA ta a hmia nama chô liata pakhaihsa sala, cha ngiachhie mawh ei sy. ABEIPA ta nâmo lâ a vaw heih sala, Thlalôhna cha pie mawh ei sy! Amen.

BO – 5

MEBÂH THIEHPA ALY PANGIANA

Local Church hropa tawhta tlyma, phu/py hropa tawhta tlyma eima Awnanopa lâta a vaw palypazy ama y tita, Mebâh aly pangiana he Abeipano h my apakhyna liata hnei awpa a châ. Mebâh thiehpa aly pangia awpazy cha Maisâh hmiakô liata zawpi lâta aheipa ta paduasapa châ aw ta, aly pangiatuhpa ta hmia pahnosana a hnei aw. Chatawhta Chakaotuhpa ta he biezy a reih aw.

Chakaotuhpa

Kho chaipa saih u, Khazohpa cha eima chô liata pha ta, eima local church liata mebâh thiehpa miah a pie hih. He sahlaozy he eima awnanopa liata pahlaow awpa ta aly pangiana eimâ hnei aw.

Zisu ta, “Hmeiseihta ta, hmeiseihta ta ei cha chho ei chuh, kei he mietaku ochhi cha châ na ta, mietaku vaihtuh phapa châ ei châ. Paw ta eina pahnopa hawhta keichhao ei mietakuzy ei pahnô. Ei mietakuzy châta ei hrona ei pie. Ei mietakuzy cha ama moh ta aw tyh ei na ta, âmo chhao ei ao ama thei tyh (Zh. 10:1-11),” tah ta.

Pôhpa miakha liata pachiahpa hluhpi y hra sala, pôhpa cha miakha deita a châ. Awnanopa liata mebâh hluhpi y hre'sila, eima zydua cha Krista pôhpa miakha liata pachiahpazy eima châ (I Kaw. 12).

Unawhzy adyh ngaitapa pahrâ khohpa he phata, â ngia ngaita kaw. Cha hawhpa liana chata ABeipa ta byhnâ awna bie pie ta, tlyzaw ta hrona awpa cha (Hla. 133:1,3).

Chakaotuhpa ta he hawhta bie reina a hnei khai nahta thlahchhâna hnei aw ta, aly pangiana ku chachâh lâ chibaih â bu aw.

Atanoh _____ noh ta nâ / nâmo sahlaozy he, eima Awnanopa liata aly kawpa ta eima pangia. He awnanopa liata thlalôh kawpa ta y ula, ABeipa ta byhnâ cha pie lymâ mawh ei sy. Amen.

Thlahchhâna & alyna ku hlâna

BO - 6

CHHOREIPAZY APY HEIHNA

Khichhôh Awnanopa ryureina ta Chhoreipa a py heih awpa ta a paryhsapa (zy) cha maisâh lâ aheihpa ta paduasapa a châ aw. Âryh khiah cha hlasana chhao hneipa a châ aw.

Chakaotuhpa

Atahmâ a vy u la, pachâ khoth tua ei suh u, ABeipa ta a tah. Nama moleina zy sailaw hawhta saih hrasala, dâhaw hawhta a ngyuh aw; saihdôpa hawhta saih haw hrasala, mietakupa hmi hawhta ama y aw (Is. 1:18).

Kei, kei tlai he, keimasasyh vâta nama taopasinazy a ngiahthaituhpa cha ei châ, nama moleinazy chhao a thei thlâh hâ aw va na (Is. 43:25).

Chatanachata ano ta ama hnohta, he pakhona bie he reih ta: “Nâmo hry liata ahyrai ta mietakupa zakha hnei ula, ama hry ta pôhkha a pahlei hapa châ ula, râhpathohpa liata sychaki nata pôh chaki cha siesaiapa ta, a leipa cha a hmô heih hlâ lei, ahy e a thua leipa a y aw ei chi? Chatawhcha a hmô

heih nahta, a ly ngaitapa ta a ngiatlâh liata a khaih tyh. Chatawhcha o a tlôpata nahta a viasazy nata a vaihzy awpakhy ta, ama hnohta, ‘Na lykhei teh u, ei mietakupa pahleipa kha ei hmô haw heih,’ a tah tyh. Ei cha chho ei chuh, cha hawhna hra chata chyhsa siapa sychâki nata pachâki moleinazy ro awpa a hnei hlei leipazy hlâ ta cha, moleipa pakha a ropa chôta avâ liata alyna a y via aw (Lk. 15:3-7).

Hiahrina: AtahmâawnanopanataKhazohpa hmiakô liata Khazohpa khozi hawhta hroh lymâ awpata liahsa nâ (nâma) chhuah ma?

Achhyna: Liahsa ei (eimâ) chhuah.

Zawpi a dua khaipa ta Chakaotuhpa ta he biezy he a rei khai nahta akaona ku chachâh lâ a hlâ aw (ei).

Abeipa Khazohpa ta na (nama) taopasinazy cha mypata na (nama) moleinazy cha a thei thlâh hâ khao leipata, cha ngiahthai (ei) ta, a chaly (ei), na (nama) lâpi zydua liata cha hrôbieh (ei) sala, a bâh thatlôna ta cha vaih (ei) sala, byhnâ cha pie mawh (ei) sy.

Krista nata a Awnanopa mohta, apy heihna akaona ku chachâh lâ ei cha hlâ (ei) (*akaona ku chachâh lâ hlâ awpa*).

Zawpi atyupa ta chhoreipa apy heihpa (zy) châta Chakaotuhpa ta ano khonazie ta thlahchhâpa aw ei ta, chakaona pachhâsa pa a châ aw.

BO – 7

ATHIPA RI CHAKAONA

He chakaona he Krizyh leipa thina liata hmâpa châ aw vei. Vasua ru tuna tlyma, kheihawhpa kyh ryhpaoh thai leina vâ tlyma a châ leipa khiahta cha, he chakaona he thlâsu cheingei liata hmâpa a châ aw. Thlâsu athihpa paziana hmiakô liata a duapa ta Chakaotuhpa ta he Khazohpa biezy he a reih aw.

Hlasana nata thlahchhâna

Hlasana nata thlahchhâna y khai tawhta Chakaotuhpa ta a ry liata Biehrai bie a khopazy reina a hnei aw.

“Kei he thyuheihna nata hrona ei châ; ahyrai na ngiapâpa cha thi hrasala a hroh thlaha aw, ahrohpa maihta nâ ngiapâpa cha chhâzaw ta thi aw vei. Cha bie cha nâ ngiapâ ma?” tah ta (Zh.11:25-26).

Nâ chatlaituhpa a hroh thlâh haw tahpa ei pahno, ano cha noh chhâna noh liata ryureina liana chata eina duakhei aw. Ei vopa cha leidia khai hrasala, chatawhna cha ei sapa ta Khazohpa ei hmô tlai aw (Zb. 19:25-26).

“Ei nô chhi tawhta thluahruapa ta ei vaw pua, thluahruapa ta ei kua heih aw, ABEIPA chata pie ta, ABEIPA chata a la haw heih. ABEIPA moh cha reithaipa ta y mawh sy!” tah ta (Zb. 1:21).

He khizaw liana heta khâpahmâh a ngia khei tlôh lei khah pi ta, khapahmâh pua khei thei hra ma pi (I Tim. 6:7).

Keima ei hropa vâta nâmo chhao nama hroh hra aw (Zh.14:19b).

Hmeiseihta ta, hmeiseihtata ei cha chho ei, a daihti a vaw tlô daima, atahmâ chhao a tlô haw, chatinachata a thipazy ta Khazohpa Sawchapawpa ao thei aw ei ta, a theipa maihta ama hroh aw (Zh. 5:25).

Chi kha y, kei hmiatua chaipa nata hnôh chaipa nata a hrohpa cha ei châ; thi haw na ta, châhrasala nahthlie teh, chhâzaw chhâna taihta ei vaw hroh haw hih! Thina nata athiipa kih châhbizy cha ei hnei hra (Bip.1:17b-18).

Krista cha a thihpa hry tawhtapa pathyupa ta a y hmeiseihpa a châ, âmôpazy thyuna hmia âsatuhpa a vaw châ haw. Chyhsapa vâta thina a vaw ypa vâta, chyhsapa vâ lilaw ta a thipa thyuheihna a vaw y haw hra. Ada liana chata chyhsa zydua ama thi tyhpa hawhna heta, Krista liana chata chyhsa zydua pahropa ta ama y hra aw (I Kaw.15:20-22).

Eima pahrâna alei byureih o he phiepa châhrasala, avâ liata o ku ta sa leipa, chhâzaw ta a y awpa, Khazohpa tawhtapa o a-IPA cha eima hnei tahpa pahno tlôh pi ta (2 Kaw. 5:1).

Hawtipa Pabuna liata rei awpa

“Ama nodi khao leipa aw ta, ama dâhphi khao hra aw vei; noh ta ama chôta vaw hra leipa aw ta, noh kâhna raita ama rie patheisa khao hra aw vei. Mietakutaw beidyuchhai liahliata a ypa cha, âmo vaihtuhta châ aw ta, hrona tihnawh lâta zy â chhieh aw ta; chatawhcha Khazohpa ta ama mo liatapa mothlih zydua a hru khai aw,” tah ta (Bip. 7:16-17).

Nâ châhkheituhta a hroh thlâh haw tahpa ei pahno, ano chata noh chhâna noh liata ryureina liana chata einâ dua khei aw, ei vopa châ leidia khai hrasala, cha tawhna chata ei sapa ta Khazohpa ei hmô tlai aw (Zb. 19:25-26).

Pabuna

Chyhsapa chanô ta a sapa, hro nawpata noh chyhta a hnei, cha noh liana chata ngiarohna kyh ta a bie thlâh haw. Ano cha vaw laiseih ta, pawpi hawhta chhawhpa ta a y thlâha aw, nohpahlipa hawhta a lei aw, a yzie chhao a ualuapa ta y thlâh hâ thei beih vei.

Hrona hry liata thina liata eima y thlâh ha aw.
Hy! Abeipa nâma leipata ahy lâta e palôtlahna
eima tlua thei aw? Nâma cha hârâpa paw nata
nôhmei avahpa ta ypata bie maniah na taihpa vâta
eima palôh patlâh heih mah y.

Ri chô liata Chakaona

*Ri chô liata alei ei thôh thypata he biezy he
reipa a châ.*

Khazohpa atotaotheipa, ano zawngiahna kyh
zieta ano lâ tlai ta eima unawhpa/sitanô/saw
thlahpa la awpa ta â ryh a tahpa vâta ano pôhpa
cha alei liata eima soh.

Alei lilawta châ heih ta,
Buchâh lilaw ta châ heih ta.
Dohlei lilaw ta châ heih ta,

Chhâzaw hrona thyuheihna pachyu ngaitapa
cha eima ngiapâna zie hawhta, ABeipa Zisu Krista
vâta ano tlai ta, a hmotaotheina rônahna zie
hawhta, eima pôhpa thutheipa he ano pôhpa rônah
ngaitapazie hawhta thyuheihna pôhpa ta a vaw
paysa aw, Amen.

Hlasana hnei khai nahta he bie he reipa a châ.
Avâ tawhta ao chata:

“Atahmâ rakha tawhta ABeipa liata a thipazy cha ama nohlao na, Chahawna tlai chata, Thlahpa chhao cha a reih hra, ama hriapasanazy cha amâ pahâsai thei bâ aw, a tahpa ei thei”

Thlahchhâna

Eima Paw avâ liatapa, eima pôhpa nawh ngaitapa he rônah ngaitapa ta a taopathi theituhpa, eima Beipa Zisu Krista liata thyuheihna nata chhâzaw hrona hnabeiseihna chôta he eima unawhpa/sitanô/saw pôhpa he thlâ liata pabupa ta eima siesai aw. Nâ thlalôhna khizaw ta maniah a pie thei leipa cha eima hnohta y lymâ awpata pasaih mah y. Eima Beipa Zisu Krista vâta, Amen.

Byhnâ awna

Nama pao lei nawpa ta cha hrôbieh theipa ei nata, a rônahna hmiakô liata a thata alyna chôta seinah nei leipa ta cha soh theipa ei, maniah Pachhatuhpa Khazohpa hmeiseihpa deita hnohna chata, eima Beipa Zisu Krista vâta daihti zydua y hlâta nata atahmâ nata chhâzaw ta palyupalihna zy, rônahna zy, bieheina zy y mawh sy! Amen (Zu. 24,25).

BO – 8

BÂTINA PACHUNA

Bâtina Pachuna' tahpa cha Zisu Krista cha ABeipa nata Pachhatuhpa ta a (amâ) pyh thei nawpa ta, Khazohpa Bie nata Awnanopa Biezyhpa hmâpa ta pachuna a châ. Khichhôn Awnanopa ta ama local chhôn liata Assembly ta a thliepa kô tloh taraw ta, a bâti mâh leipa nata bâti châ awpa a khohpazy maluh sianô kawpa ta a la aw. Âmozy pachutuh awpa rao aw ta, ama chu chhôn ta Biatuhpa Pastor ta âbyuhna hawhta Khazohpa bie nata Awnanopa siezie ama pahnopasia thei awpa ta a mopado tyh aw. Pachha châna liahsa pahno ei sala, awnanopa yzie ama pahnopasia tawhta bâti pachâsa awpa a châ aw.

Hmo ânapa (Sacrament)

1. Hmo ânapa (sacrament) tahpa yzie reih teh?

“Sacrament” tahpa yzie cha hmo ânapa, hmo ziehpa, pathaihpa, thina taihta Krista châta ngâchhihpa ta y awpata bie a taihna châ ta, Krista nata ano ngiapâtuha zy thlahpa liata apôkhana palâhâhna a châ.

2. Hmo ânapa (sacrament) sâ khazie a y?

Zisu Krista ta Sacrament a taopa, awnanopazy ta eima za ngâsâpa nata pasô kawpa sâno a y. Chazy cha Bâtina nata Abeipa Zâpati (Abeipa Tlâkhai) zy a châ.

Bâtina

1. Bâtina he khâpa e a châ?

Bâtina tahpa yzie cha, ti liata nypa tlyma, tita hrypa tlyma tahna a châ. Ngiapâna ta Zisu Krista cha Beipa nata Pachhatuhpa ta a pyh hawhpazy ta Zisu Krista thisaih sôhpa ta ama moleina zydua a pasi khai haw, tahpa palâhâh nawpa; ano biepiepazy zyh ta Ano a châkheituhpa châ ha bâ awpata Ano biepiepa hawhta Paw nata Sawchapaw nata Thlahpa Pathaihpa moh ta ti liata nypa tlyma, ti ta hrypa tlyma a châ.

2. Bâtina heta khâpa e a pamosa?

Zisu thi ta a thyuheihpa hawhta keimo chhao moleinazy thisaipa ta hmo phapa lâ eima hroh haw tahpa pamosana a châ.

3. Moleinazy thisaipa ta hmo phapa lâta a hroh hawpazy cha khei hawhta ama y awpa a châ?

Moleinazy siesaipa ta Krista eima châta â pienazi hawhta, pôhpa, thlahpa nata hneina zydua Krista châta hmâ khaina zie he ama hrozie awpa, a Kyhpachâna zy, ngiachhiena zy, areisina zy, asohsina zy nata tiamâna zy ama hnei awpa a châ. Zisu Krista moh parônahsa nawpata Awnanopa phôryhpa zydua zy awpa ta nata â vaonazie nata chhoreina zydua a pyh ta zyh lymâ awpata khatinoh rai âmâ thlâh hâ awpa a châ.

4. Bâti na châ tawhta hro chhôn ta na my lei awpa bietaihpaзы reih teh.

Zisu, Khazohpa Sawchapawpa cha kyh ei na pachâ ngaita kawpa vâta keima moleipa vyuhpa ta a thi, hriena su nata moleina liatapa eina pachha haw tahpa ei ngiapâpa vâta ano kyh ei pachâ. Ei hrochhôn ta ano khohpa lâ tao lymâ awpa ta ei chhuah, ano ota ei pôhpa liahsa ei pie.

Zisu thi ta a hro heihpa hawhta, kei chhaota moleina lâ thi saipa ta hmo phapa lâ ei hroh haw, tahpa pahno s'awpata bâti châ awpa ei chhuah.

Chatawcha keima dei châ leipata ei sôh nata ei ^{piah,} ei sâh nata ei bia chhao, Zisu eih a châ tahpa pahno thlâhpa ta hiatlia leipata Khazohpa tovyuhpa ta khâ ei sopa hra aw.

Thlahpa Pathaihpa ta eina baopa ta khizaw phasana kyh cha liahsa ei ro. Abeipa ta noh a raopa he cha-y ta a pakhy tyh awpa nata ano palyupalih tyh awpa ta a chhô a zâ ta ei mâ thlâh hâ aw.

Awnanopa sahlaô phôryhpa yzie zydua Abeipa Zisu Krista palyupalihpa ta liahsa zyhpâ nata reithai tyhpa ta ei y lymâ aw. Amen.

5. Kheihawhpa chyhsazy e, Bâti a châ ei?

Zisu Krista cha ama Beipa nata Pachhatuhpa ta a pyh ta, Awnanopa dâh/ryhpa hawhta hro â chhuahpazy ta Bâti ama châ tyh.

6. Ei khâ bâti hâ tawhta bâti heih theipa a châ ma?

Zisu cha ei kha thi ta a thyuheihpa hawhta Ngiapâtuhpâ cha ei kha deita bâti a châ awpa a châ.

7. Nâma zaw, na moleina tlokhuh siesai ta Zisu zipa na ngâh ma?

Abeipa ta na bao sala, liahsa ei ngâh thlâh hâ aw.

Abeipa Zâpati

1. Abeipa Zâpati he khâpa e a châ?

Abeipa Zâpati he Abeipa Tlâkhkhai tahpa ta awpa a châ hra. Zisu Krista keimo vyuhpa ta a thina nata a hlâ khaina zy, cha cha eima hrona hnawh a chânazie khâ a thei thlâh nawpata, ngiapâna ta viahchhâ nata Kresawhti nie nata dopa he a châ.

2. Abeipa Zâpati niena liata viachhâ nata Kresawhti heta khâpa e a pamosa?

Abeipa Zâpati dohna liata Viahchhâ nata Kresawhti he eima thlahpa châta Zisu Krista cha chhâzaw châta hrona viahchhâ a châzie nata a thisaih chhao châ eima hmoparaohnazy ngiahthai nawpa ta chyhsa hluhpi châta a lohpa, Biehrai Thiehpa a châzie a pamosa.

3. Khazia e, Abeipa Zisu ta Abeipa Zâpati he tao tyh awpata maniah a pachu?

A ngiapâtuhpazy pi ta, Zisu thina cha keima châta atheihna a hlâna a châzie pahno chanei heih ta, Ano hawhta a hlâpa ta chakao lymâ awpa âbyuh zie zy maniah pahnosa ta, cha pahno pathina chata thatlôna thiehpa eima hnei lymâ thei nawpa, a biepiepazy hrochhôn ta tao ta, â vy heih hla lei cha my leipa ta khâ eimâ thei thlâh nawpa ta a châ.

4. Bâtina liata ti zy, Abeipa Zâpati niena liata viahchhâ nata kresawhti zy he khâpa e a phahnai na?

Bâtina liata ti zy, Abeipa Zâpati dôhna liata Viahchhâ nata Kresawhtizy a phahnaina cha: he hmobaohzy vâta châ leipata, a patohpatiatuhpa (minister) vâta chhao châ hra vei. Zisu Krista thina nata thyuheihna zawzi ta tlaô a châ. Anô ngiapâtuhpazy hnohta Zisu Krista ta tao awpata bie pie ta, byhnâ a piepa vâta ngiapâtuhpâ ahyrai ngiapâna ta Abeipa Zâpati a hlypa chô liata Khazohpa Thlahpa ta rai a hriapa vâta phahnai hmeiseih ta a sôh ngaitapa a vaw châ haw.

5. Abeipa Zâpati he ahyzy ma a dôh aw ei?

Zisu Krista a ngiapâ ta, a biepiepa zyhpâ ta Bâti a châ hawpa, Abeipa kyh a pachâtuhpâ sahlaozy deita ta dôh awpa a châ.

6. Abeipa Zâpati he moleipazy ta ama nie thei hra ma?

Chyhsa siapazy châta Krista cha thi leipa ta moleipazy châta tlaô a thipa vâta nie thei awpata a châ. Anodeikua ngiahthai tlâhpa ta moleinazy ro ta, Abeipa hmiakô liata palâhâh leipa ta viahchhâ nata kresawhti nieta a dôhpa cha sapa nata thlahpa châta hmo chichhieh ngaitapa nata rarôh y ngaitapa

châ ta, Krista pôhpa, Krista Awnanopa pei a hriapa a châ. Krizyh leipazy chata Abeipa Zâpati nie thei aw vei ei.

8. He hiahrina zydua he liahsa pahno pasia ta a vao khaipa ta, he bie hawhta hroh lyma nâ chhuah ma?

Abeipa ta na bao sala, liahsa ei chhuah.

Apostôl-zy Bie Ngiapâpa

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khaipâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpa nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa mo to a pahlypa zy, mopathaih penawh akaona zy, molei ngiahtaina zy, pôhpa thyuheihna zy, chhâzaw hrona chhao ei ngiapâ. Amen.

**Abeipa Thlahchhâna
(The Lord's Prayer)**

Eima Paw vârah liatapa, na moh zachhih mawh sy. Na khihnarâh vaw tlô mawh sy, na khohpa la vârah liata ama taopa hawhta, alei liatapa ta tao mawh sy. Nohchareih niepa maniah pie mah y. Eima chô liata hmo paraopazy eima ngiahthaipa hawhta, hmo eima paraopazy maniah a ngiahthai hra mah y. Reipasaona lâta maniah a chhih kha y; moleipa tawhtapa maniah pachha mah y. Khinarâh zy, hmotaotheina zy, rônahna zy, tlyzaw ta nâ eih châ tlôh ta. Amen.

BO – 9

BÂTI PACHÂSANA

Bâti pachâsana he apakhyna liata tlyma, program eihpa taopa tlyma hmâ thei awpa a châ aw. Mara Evangelical Church ta Bâti no ta ti liata nypa tlyma, Ti ta hrypa tlyma ta a hmâh.

Bâti awpazy hruana

Zawpi Hlasana y aw ta, Chakaotuhpa ta tlyma, Local Secretary ta tlyma, Bâti awpazy cha Maisâh hmiakô lâta a vy awpa ta hrua aw ei ta, zawpi lâ a heihpa ta paduasa aw ta, ama moh nata nô/paw moh reipa ta zawpi lâta hmia pahnosana hnei tuapa a châ aw.

Chakaotuhpa Zawpi lâta

Kho chaipa saih u, nahthlie teh u, Khazohpa Sawchapawpa Zisu Krista eima Beipa he khizaw liata a thipa hry tawhta thyuheih ta a vârah lâ a kia chy ta, pho to chyhsa hryta ahyrai a bie liahsa a zyhpâ maih, Krizyhpâ châ nawpata Paw nata Sawchapawpa nata Thlahpa Pathaihpâ moh ta Bâti pachâsa awpata bie maniah a piepa hawhta, he sahlaozy he Bâti pachâsa awpa ta eima chhuah.

Eima Beipa Zisu Krista cha keimo maniah chatlai awpa ta tho kraws liata thi ta, pabupa ta y ta, a noh thôhpa noh ta athipa hry tawhtapa a thyuheihpa hawhta, ano â ngiapâtuhpazy cha moleina liata thipa ta Khazohpa lâta ama hroh haw, tahpa pamosana nawpa ta, he sahlaozy he ti liata nypa ta / ti ta hrypa ta bâti pachâsa awpa a châ aw.

Abeipa Zisu tlaita, ‘Sie u la, pho to pachupazy ta tao ula, Paw nata Sawchapawpa nata Thlahpa Pathaihpa moh ta, a bâti teh-u’ (Mt. 28:19) a tah.

Hmeiseihta ta, hmeiseihta ta, ei cha chho, chyhsa ahyrai ti ta nata Thlahpa ta ama pih leipa khihtala Khazohpa Khinarâh liata a ngia thei aw veih ei (Zh. 3:5).

A ngiapâ ta bâti a châpa cha pachhapata y aw ta; a ngiapâ leipa deikua châ thailei châpata ama y aw (Mk. 16:16).

Thlahchhâna

Hy Khazohpa eima Paw, ato zydua ataotuhpa y, atanoh he na biepiepa hawhta tao ama khohta vâta he Bâti châ a chhuahpenawh he ama chôta na byhnâ pha chaipa pie la, tlyzaw pachhana ryu ama to thei nawpata Thlahpa Pathaihpa ama chô ta patlôsa la, thina taihta ngâchhihpa ta y awpata lathlôh siapa liata a chhi la, Paw nata

Sawchapawpa nata Thlahpa Pathaihpa, nâmo Pathôh hmaohkha liata chhâzaw ta ngâchhihpa ta ypata bao mah y. Amen.

Chakaotuhpa ta Bâti a châ awpazy lâta

Nâmo Abeipa kyhpachâtuhenawh y, nahthlie teh u, atahmâ Bâti châ awpata he liata namâ vy. Atahmâ thlâh eima chhâ nota eima Beipa Zisu Krista ta a châ lypa ei nata nama chô liata byhnâ awpata moleina thi saipata vârah khihnarâh liata ngiapâna ta chhâzaw hrona chhao a cha piepa ei, eima hiapa nama pahno. Abeipa Zisu Krista chata Ano Bie pathaihpa liata eima hiapazy pie awpa ta bie miah taih; Ano bietaihpa cha â i tahpa eima pahno. Chavâta Abeipa Zisu bietaihpa hawhta nâmo chhao Khazohpa nata awnanopa hmiakô liata bie liahsa namâ taih awpa vâta he hiahrinazy he ngâchhih ngaitapa ta namâ chhy awpa a châ.

Bie hiahrina nata achhyna

1. **Hiahrina:** Satâ raihriana zydua a heihsaipa ta, he khizaw rônahna nata phasana khâpa hrao leipa, sapa aohraohna, uahvâna nata moleina kyh zydua liahsa nama siesai aw ma?

Achhyna: Abeipa baona ta ei siesai aw.

2. **Hiahrina:** Zisu Krista cha na Beipa nata Pachhatuhpa ta na pyh ma?

Achhyna: Ei pyh.

3. **Hiahrina:** Zisu Krista moh tah deileipa ta chyhsa zydua hry liata ahy châta rai, Khazohpa ta a ngiahthaina nata a pachhana pie khao vei, tahpa nâ ngiapâ ma?

Achhyna: Ei ngiapâ.

4. **Hiahrina:** Khazohpa Paw nata Sawchapawpa nata Thlahpa ama pathôh ta hmaohkha ta, Khazohpa pakha ama châ tahpa nâ ngiapâ ma?

Achhyna: Ei ngiapâ.

5. **Hiahrina:** Zisu Krista a zyhpenawh châta, vârâh liata tlyzaw alyna a y, tahpa nata Zisu Krista a zyh leipenawh châta hriena su liata chhâzaw pasataona a y, tahpa nâ ngiapâ ma

Achhyna: Ei ngiapâ.

6. **Hiahrina:** Zisu Krista cha a thipa hry tawhtapa thyuheihpa ta khizaw liata noh sypalih y ta, vârâh a kiapa hawhta, ano bietaihpa daihti a tlô nahta ano a zyhpenawh aw pakhy awpata a

za chô heih aw, tahpa nâ ngiapâ
ma?

Achhyna: Ei ngiapâ.

7. **Hiahrina:** Khazohpa khopa nata a biepiepa
pathaihpahzy zyhpâ ta na hrochhôn
ta cha liata charei awpa ta na khoh
ma?

Achhyna: Ei khoh.

8. **Hiahrina:** Apostol-zy Bie ngiapâpa na pyh
ma? Nâ py khiah, vaw reih teh.

Achhyna: Ei (ma) pyh.

Khazohpa, Paw atotaotheipa, alei nata avâ
taotuhpa cha ei ngiapâ.

A Sawchapaw matlupa Zisu Krista chhao ei
ngiapâ. Ano cha Thlahpa Pathaihpa ta paphaosa ta,
Laihsa kôpa Mari ta sa ta, Pawtia Pila ry liata pasa
taopa ta y ta, khai-pâpa ta y ta, thi ha ta, pabupa ta y
ta, athihpa khi lâta zu ta, a noh thôhna noh ta a
thihpa hry tawhtapa thyuheih ta, avâ lâta kaw kiah
ta, chatanachata Khazohpa Paw, atotaotheipa ku
chachâh lâta a tyuh ta, chatanachata a hrohpa nata
a thihpa pachia awpa ta â zu aw.

Thlahpa Pathaihpa zy, Awnanopa pathaihpa
moto a pahlypa zy, mopathaih penawh akaona zy,

molei ngiahthaina zy, pôhpa thyuheihna zy, chhâzaw hrona chhao ei ngiapâ. Amen.

9. **Hiahrina:** Khazohpa hmo pathaihpa maih na hro chhôn ta paphôn leipa ta thina taihta â ipata zyh ta tao lymâ awpa ta bie liahsa namâ taih ma?

Achhyna: Khazohpa ta na bao sala, a bie zydua zyh ta tao lymâ awpata ei chhuah.

10. Cha khiah, bâti châ awpa nâ chhuahna bietaihpa a sia ngâsâpa ta reih teh.

Zisu, Khazohpa Sawchapawpa cha kyh ei na pachâ ngaita kawpa vâta keima moleipa vyuhpa ta a thi, hriena su nata moleina liatapa eina pachha haw tahpa ei ngiapâpa vâta ano kyh ei pachâ. Ei hro chhôn ta ano khohpa lâ tao lymâ awpa ta ei chhuah, ano ota ei pôhpa liahsa ei pie.

Zisu thi ta a hro heihpa hawhta, kei chhaota moleina lâ thi saipa ta hmo phapa lâ ei hroh haw, tahpa pahno s'awpata bâti châ awpa ei chhuah.

Chatawcha keima dei châ leipata ei sôh nata ei piah, ei sâh nata ei bia chhao, Zisu eih a châ tahpa pahno thlâhpa ta hiatlia leipata Khazohpa tovyuhpa ta khâ ei sopa hra aw.

Thlahpa Pathaihpa ta eina baopa ta khizaw phasana kyh cha liahsa ei ro. Abeipa ta noh a raopa he cha-y ta apakhy tyh awpa nata ano palyupalih tyh awpa ta a chhô â zâ ta ei mâ thlâh hâ aw.

Awnanopa sahlao phôryhpa yzie zydua Abeipa Zisu Krista palyupalihpa ta liahsa zyhpa nata reithai tyhpa ta ei y lyma aw- Amen.

Bâti Pachâsana

Zawpi a duah aw ei ta, Bâti awpazy cha bătina tikhaoh liata tlyma, maisâh hmiakô liata pakhupaneihpa ta tlyma, Chakaotuhpa ta ama moh reipâ lymâpa ta, ti liata ei kha nypa ta tlyma, ti ta hrypa ta tlyma Bâti a pachâsa lymâ aw. Bâti hai nota Chakatuhpa ta a ry liata bie he reih aw ta, zawpi deikua cha “Pachhatuhpa hnohta saikao lia chhao sie ei khoh” tahpa hla ama sa aw.

Moh _____, Paw nata Sawchapawpa nata Thlahpa Pathaihpa moh ta ei cha bătî.

Thlachhâna

Khazohpa eima Paw, he sahlaozy he Bâti châpa ta na pasai hawpa vâta alyna bie eima cha hlâ. Atahmâ tawhna heta noh to ta Kraws a pupa ta a khaihpa saw hawhta khizaw liata eima y chhoh liana heta, nâma palyupalihpa ta khaihna liata eima sie lymâ thei nawpa ta maniah chhitha mah y. He khizaw liata eima hrona a chhâ tita, na o lâta maniah a chhitha mah y. Zisu Krista moh ta eima cha hiapa vâta. Amen.

Hlasana & Byhnâ Awna

Eima Beipa Zisu Krista ngiachhiena, Paw Khazohpa kyhpachâna nata Thlahpa Pathaihpa Khazohpa akaona byhnâ cha, nâmo Abeipa kyh a pachâpa maih zy hnohta atahmâ tawhta tlyzaw taihta y thlâh mawh sy. Amen.

BO – 10

BÂTI THIEHPAZY AKAONA PATHAIHPA LIATA ALYNA

Bâti thiehpazy cha paduasapa ta Chakaotuh- pa ta a ry liata biezy a reih aw.

Chakaotuhpa

Kho chaipa saih u, atahmâ aly ngaitapa ta Krista awnanopa sahlao hry liata pahlao awpa ta akaona ku chachâh lâ eima cha hlâ aw. Chavâta atahmâ tawhta nâmo cha Zisu Krista cha maniah chatlai nawpata Kraws liata a thi, tahpa noza leipa ta nama palâhâh tyh awpa; moleina zy, khizaw phasana zy, Diabaola nata ano lyuhchâpazy cha riahpha ngaitapa ta adyuh lymâ awpa nata thina taihta Zisu Krista pheisaih ngâchhihpa nama châ awpa âbyuh. Chavâta Khazohpa bie pathaihpazy he pachâ teh-u:

Ahyrai Krista liata a ypa chata hmotao thiehpa vaw châ ta; hmoparohpazy cha lei haw ta, pachâ teh-u, athiehpa a vaw châ haw (2 Kaw. 5:17).

Khaparai châ sala nama hro yzie cha Krista Thâtihpha nata ahmie tua se (Phil.1:27).

Ahyrai chyhsa hmiakô ta nâ châhkheipa maih cha, ei Paw avâ liatapa hmiakô ta ei châhkhei hra aw; ahyrai chyhsa hmiakô ta nâ paphapa maih, ei Paw avâ liatapa hmiakô ta ei papha hra aw (Mt. 10:32, 33).

Thina taihta ngâchhihpata y teh, chatanachata hrona lakho ei cha pie aw (Bip. 2:10).

Bâti thiehpazy lâta

Nâmo Bâti thiehpa sahlao saih u, Bâtina kyh ta Zisu Krista a bupa ta nama y hawpa vâta Khazohpa nata khaihpa sawzy nama châ haw. Chavâta moleina zydua siesaipa ta Krista hrona thiehpa liata nama ngia haw. Chavâta he Abeipa Zâpati akaona pathaihpa liata eima châ ly. Atanoh tawhta Awnanopa sahlao akaona pathaihpa liata pahlaopa nama châ haw, tahpa eima cha pahnosa. Atahmâ eima Beipa Zisu Krista moh ta akaona ku chachâh lâ eima cha hlâ aw.

Bâti thiehpazy Chakaotuhpa lâ vaw pua aw ei ta, Chakaotuhpa ta pakha pakha ta ku chalyuna hneipa ta a ry liapa bie a reih aw.

“Zisu Krista mohta akaona ku chachâh lâ ei cha hlâ, Abeipa ta byhnâ cha pie mawh sy,”

tah aw ta, bie a rei khai nahta amâ tyuna su lâ ama pangai awpa a châ.

BO – 11

ABEIPA ZÂPATI

He chakaona he chakaona hropa nata pazao leipa ta hmâ awpa a châ. Pastor nata Machâzy ta thlahchhâna chô ta, ama patohpatia awpa a châ. Abeipa Zâpati niena liata viahchhâ nata nyu he zawpi lâta raipa ta tlyma, Zawpi ta maisâh hmia lâta viahchhâ nata nyu lapata tlyma chakao theipa a châ.

Hlasana nata Thlahchhâna

Hlasana y tua aw ta, Chakaotuhpa ta thlahchhâna a hnei aw. Abyuh khiahta cha sermon chyupa (5-10 minutes) reina Chakaotuhpa ta a hnei aw.

Molei Palâhâhna

Unawh saih u, Khazohpa bie pathaihpâ nahthlie awpa nata eima Beipa Zisu Krista sapa nata thisaih cha nie ta doh awpata eima pakhy. Chavâta keimo sasyh ta â pasia ei sila, Khazohpa ngiachhiena liata eima moleina zy reihpha cheipa ta atahmâ Ano cha ahnia ei suh u.

‘Moleina hnei va na’ eima tah khihtala, keimosasyh ta eimâ dô, biehmeiseihpa keimo liata y vei. Eima moleinazy reihpha eimâ cheih khihtala, eima moleina zy a ngiahtai awpa nata eima sia leina zydua pasia awpata Ano cha ngâchhihpa nata a siapa a châ (1 Zh 2:1-2).

Krista Zisu moleipazy pachha awpa ta khizaw lâta â vy, tahpa he ngâchhihpa nata apy tlâh ngaitapa a châ (1Tim. 1:15).

Molei Palâhâhna Thlahchhâna

Eima Beipa Zisu Krista vâta Khazohpa nata aryh heihpa ta eima y thei nawpa ta atahmâ eima moleinazy cha Khazohpa atotaotheipa hnohta palâhâh suh vy.

He ary liata molei palâhâhna thlahchhâna he Chakaotuhpa ta reih aw ta, zawpi ama zi lymâ aw.

Eima Paw avâ liatapa y, nâma nata eima vaih chô liata eima molei haw. Khaihna liata a charei awpa eima châ tarawpa ta zohna liata tlaao eima charei. Krista moh phaoth pi ta, chahrasala moleina siesai khai thei ma pi, Zaw maniah angiah awpa ta eima châ haw chaimâh na. Zisu Krista vâta eima moleina zydua maniah a ngiahtai la, na Thlahpa Pathaihpa ta maniah pathai mah y. Eima chhie nata pha pahnona pahro la, mo hropazy a ngiahtai thei

awpa ta maniah bao hra mah y. Hrona thiehpa ta cha chakaopata na Moh pathaihpa eima parônahsa thei nawpa ta maniah bao mah y. Eima Beipa Zisu Krista vâta. Amen.

Apostôl-zy Bie Ngiapâpa

Zawpi aduapa ta eima ngiapâna palâhâhna châta Apostol Bie Ngiapâpa he rei awpa a châ.

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khai-pâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpa nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa mo to a pahlypa zy, mopathaih penawh akaona zy, molei ngiahtaina zy, pôhpa thyuheihna zy, chhâzaw hrona chhao ei ngiapâ. Amen.

Khazohpa Bie Nahthliena

Khazohpa ta khizaw kyhpachâ ngaita ta, chatanachata a Sawchapawpa matlupa pie ta, Ano cha ahyrai a ngiapâpa maih leidia leipata, chhâzaw hrona tlaô ama hnei nawpata (Zh. 3:16).

Biepiepa thiehpa ei cha pie ei hih, kyh a pachâ raihri ula; kei ta nama kyh ei pachâpa hawhna heta, nâmo chhao kyh a pachâ raihri teh u. Nama kyh nama pachâ raihri khiatala, chyhsa zydua ta ei pachupazy nama châpa cha liana chata ama pahno aw (Zh.13:34-35).

Ano cha eima taopasina vâta hmâh phaohpa ta y ta, eima hmoparaonazy vâta thi padôpa ta y ta, eima thlalôhna awpa ta chhoreina cha a chô liata tlah ta, a chheina hriechheihpazy ta patlâhpa ta eima y haw (Is. 53:5).

Hmo ei tao hlâta he zawpakhô pati he cha niekhei awpa ei ta ei khoh ngâsâ; ei cha chho ei chu, he he Khazohpa khihnarâh liata a hmeihseihpa a châ hlâlei la nie heih khao aw va na (Lk. 22:15-16).

Abeipa Zâpati khuna pahyna nata thlahchhâna

Chakaotuhpa ta zachhih ngaitapa ta khuna pahy awpa ta chyhsa pano a rao chhielie aw; pahy khai tawhta Chakaotuhpa ta hlâna thlahchhâna a hnei aw.

Khazohpa Bie Nahthliena

Nama hnohta ei cha piepa ei kha, Abeipa tawhta ei hmôpa cha tlôh ta. He viahchhâ he nama niena maih nata nyu cha nama dona maihta âvyheih hlâ lei cha Abeipa thina nama pamosa tyhpa a châ (1Kaw. 11:23, 26).

Kei he avâ tawhta viahchhâ hrohpa a za chôpa cha ei châ, ahyrai he viahchhâ he a nie khiatala chhâzaw ta a hroh thlâh hâ aw; Khizaw hro nawpa ta ei pie awpa viahchhâ cha ei sapa he a châ (Zh. 6:51).

He a ry liata bie rei no ta, Chakaotuhpa chata viahchhâ cha la aw ta, eichheih aw ta, a chaluah aw.

Abeipa Zisu chata patusapata a y zâ ta, viahchhâ la ta, alyna bie a rei khai nata eichheih ta, “He he ei pôhpa nama vyuhpa ta pie awpa cha a châ, eina thei thlâh hâ nawpa ei chi ta, he he tao tyh muh vy,” tah ta (Lk. 22:19).

Viahchhâ raina

Chakaotuhpa ta viahchhâ rai awpa ta a raopazy hmâpa ta zawpi lâta viahchha a rai aw. Viahchhâ rai chhôh ta zawpi hlasana a y aw. Viahchhâ ama rai haino ta tlyma, ama rai khai/nie

chyta tlyma, Chakaotuhpa ta viahchhâ chaluahna chôta he a ry liatapa bie rei awpa a châ.

Eima Beipa Zisu Krista pôhpa nama (na) châta piepa heta nama (na) pôhpa nata thlahpa chhâzaw hrona liata pabôhsa mawh sy. Krista cha na châta a thi haw, tahpa nâ thei thlâh hâ nawpata he viahchhâ he la la, nie la, alyna bie reina chôta, angiapâna ta na thlahpa pasana mah y. Eima Beipa Zisu Krista pôhpa cha hrona viahchhâ a châ.

Kresawhti Nyu

Chatanachata nyu chhao la ta, alyna bie reih ta, ama hnohta pie ta, “Nama zydua ta doh teh u, he he ei thisaih, moleinazy a ngiathai nawpa ta chyhsa hluhpi châta a lohpa, Biehraï thiehpa chana a châ; nama dohpa maihta einâ thei thlâh hâ nawpa ei chi ta, he he tao tyh muh vy,” tah ta (Mk. 14:23-24).

Nyu chaluana chôta he ary liatapa bie he rei awpa a châ. Cha khai tawta nyu raina ta a pazi aw. Rai pakipa a châ khai tawhta Chakaotuhpa ta he ary liata ropazy he reih aw ta, âraohpa ta doh awpa a châ.

Eima Beipa Zisu Krista thisaih nâma (nâ) châta a lopa heta nama (na) pôhpa nata thlahpa chhâzaw hrona liata pabohsa mawh sy. Krista thisaih na châta a loh haw tahpa nâ thei thlâh hâ nawpata he Kresawhti he doh la, alypata y mah y.

Sôh kheina nata thlahchhâna

ABeipa Tlâhkhai dôh khai tawhta deichhy byuhpazy châta sôh kheina a y aw. Sôh kheino ta nyu pakhyina, Abeipa Tlâhkhai khuna y aw ta, sôh hlâna thlahchhâna chhao a y aw.

Zawpi hlasana nata Byhnâ awna

Zawpi hlasana y aw ta, Chakaotuhpa ta a ry liata byhnâ awna tlyma, ano khona zie ta byhnâ awna a hnei aw.

Khazohpa thlahlôhna palôhrupa ta pahno tiah leipa cha, nama pathipalôh nata pachânazy, Khazohpa nata a Sawchapawpa, eima Beipa Zisu Krista kyhpachâna nata pahnona liata cha vaipa ei sala, Khazohpa atotaotheipa, Paw nata Sawchapawpa nata Thlahpa Pathaihpata byhnâ cha nama hnohta chhâzaw ta y mawh sy. Amen.

BO – 12

DYHCHÂ KU PATUNA TLÂH-AWNA

Awnanopa ryhpa hawhta dyh a châ awpazy cha Local Standing Committee ta liahsa pasia khai tua sala, a paryhsa khiatala, Abeipano my pakhyina liata ei kha tlâh-awpa a châ aw. A hatâ heihpa liata kupatusa theipa a châ aw. Tlâh-awna liata cha (ryhpaoh lei tuna kyh tah dei leipa ta cha) âmo pôhpa ama y cheingei awpa a châ.

Tlâh-awtuhpa

Pachâ teh-u,

Chapaw Paw Nô

Pho Khih

nata

Chanô Paw Nô

Pho Khih

Dyhchâ kupatu ama chhuahna bie tlâh ei aw. Ahyrai he pano penawh he, Nôvah pathaihna liata pazao awpata a su leina nata a pakhâna khapara, nama pahno khiatala, atanoh tawhta noh 5 chhoh liata châ ropa ta Local Standing Committee nata Biatuhpa pastor lâta nama pangia awpa a châ aw. He he tlâh-awna hmiatua chaipa nata hnôh chaipa a châ.

Tlâh-awna noh nata pakiana noh he Biatuhpa Pastor pahnosa lymâpa a châ aw.

BO - 13

NÔVAH PATHAIHPA KUPATUSANA

He chakaona he chakaona hropa nata pahlao leipa ta achhyna o liata tao awpa a châ aw. Chakaotuhpa ta Local Standing Committee pahnokheipa ta âbyuhpa program liahsa a tao hâ aw. Kupatusana dâh hluhpi a ypa chhaota, Mara Awnanopa ta ahmâna dâh cha atlâhpi pa ta palyu khai awpa a châ aw.

Atyuduana patohpatiana

1. Kupatuna Apakhyna chairperson, Biatuhpa pastor, Myuhneituhpa nata pahnokheituhpa cha Achhyna o liata su raopa liata ama tyuh chhielie aw.
2. Zawpi, Myuhneituhpa chhôhkha, Myuthiehpâ chhôhkha nata chakaotuhpazy cha su raopa liata ama tyuh aw.
3. Zawpi ama vaw ki khai nahta, daihti pathaona hlasana, daihti pathaona thlahchhâna nata bie pahnosa awpa âbyuhpazy pahnosana a y aw.
4. Myuhneituhpa, myuthiehpâ nata pahnokheituhpa zy cha Maisâh hmiakô liata zawpi lâ aheihpa ta atyuna su patohpatiapa a châ aw.

Myuthieh Chhihthana

1. Achhyna o liata zawpi ama ki nahta, Myuthiehpa cha a paw tlyma, chyhsa raopa pakha kha tlyma ta achhyna o liata a vaw chhihtha aw. Myuthiehpa nata pahnokheituh-pazy, kusadi chabapa nata pawpi ahietuhpazy ama vaw pazi aw. Zawpi a dua khaiya a châ aw.
2. Myuthiehpa chhihthatuhpa chata atyuna su raopa taihta a vaw chhihtha nahta, Kupatusa-tuhpa Pastor ta kupatuna cha a chhihtha aw.

Pastor ta kupatusana chakaona

Myuhneituhpa nata Myuthiehpa cha maisâh hmiakô liata zawpi lâ a heihpa ta paduasapa ama châ aw.

Unawh saih u, Atahmâ Khazohpa nata namo zydua hmiakô liata kupatusa awpa eima pachhuaahpa cha _____ local liatapa a paw _____, a nô _____ zy sawchapawpa St. _____ (pho moh) _____

nata

_____ local liatapa a paw _____, a nô _____ zy sawchanô _____ (pho) _____ zy ama châ.

Amo pano he eima Local Standing Committee paryhsana zie hawhta keima Pastor _____ ta MEC Ahneina Ryhpa hawhta ABeipa moh ta ku patusana hnei awpa a châ aw.

Kho chaipa saih u, Khazohpa mo hmô ta nata nâmo apakhy penawh mo hmô ta, he chapaw nata chanô he nôvah a hneina pathaihpa liata pazao awpata eimâ pakhy. Cha kyh cha palyupalihna kyh châ ta, Abeipa eima Khazohpa, alei nata avâ Ataotuhpa a raona kyh a châ. He hmâpa heta keimo lata Krista nata Awnanopa sahlaio a nôvahna bieparu chhao maniah a pahnosa. Krista chhaota Kalili râh Kena khi liata ahneina kyhchhi a hlao ta a palyupalih hra.

Mopathaihpa Pawla chhaota he kyh he chyhsa zydua liata palyupalihpa ta a y awpa a châ, a tah. Khazohpa ta nôvahna kyh a raona chhâpa he pahnopa ta thlahchhâna chôta Khazohpa china nata zana chô ta, eima pachâ awpa a châ.

Khâpa vâta e nôvahna kyh he Khazohpa ta a rao? Avahpa nata lapinô ta Khazohpa china nata zana chôta saw ama hnei thei nawpa, sihryhna kyh y leipa ta pathaihna ta ama hroh lymâ thei nawpa, hro chhôh vâchhiena nata vâphana kyh liata a baota a kaopata thlah a palôh ta abao rairie thei nawpa, Khazohpa zana nata palyupalihna chôta amâ hnei pazao lymâ thei nawpa ta a châ.

Zawpi lâta pahnosana

Atahmâ St. _____ nata Ls. _____ zy cha eima Awnanopa ahneina Ryhpa hawhta ama hnei thei lei nawpa ta a pakhâpa kheihawhpa rai ‘Local Standing Committee lâta pangiapa a y leipa vâta ku patusa theipa hawhta eimâ pyh. A daihti ta liata reina a y leipa vâta he kyh liata hmaomopa ta y teh u.

Nôvah awpazy lâta hiahrina

Nâmo panopenawh dyhchâpa ta ypata a suleina rai nama pahno khihtala, Khazohpa nata he apakhy penawh hmiakô liata nama phuah awpa a châ. (*Buakha a chalih awpa*) A y leipa khihta cha aly ngaita pi ta, kupatusa thei awpa a châ tahpa ta eimâ pyh aw.

Chapaw hnohta hiahrina

Moh

He chanô na lapinô châta na pakiapa he, Khazohpa raopa bie hawhta nôvah pathaihnakyh liata hmaohkha ta y awpa na kho ma? (*Ei khoh*). Ano kyh na pachâ aw ma? (*Ei pachâ aw*). Ano na palyupalih aw ma? (*Ei palyupalih aw*). Ano thlah na palôh aw ma? (*Ei palôh aw*). Tlâh no nata tlâh lei nota chhao ano na deichhy aw ma? (*Ei deichhy*)

aw). Chanô hropa zydua pathlua khaipa ta, ano deita na hrochhôn ta na hnei thlâh hâ aw ma? (*Ei hnei thlâh hâ aw*).

Chanô hnohta hiahrina

Moh

He chapaw ta a lapinô awpata a cha pakiapa he, nâ vahpa châta, Khazohpa raopa bie hawhta nôvah pathaina kyh liata hmaohkha ta y awpata na khoh ma? (*Ei khoh*). Ano bie na zyh aw ma? (*Ei zyh aw*). Ano na chakao aw ma? (*Ei chakao aw*). Ano kyh na pachâ aw ma? (*Ei pachâ aw*). Ano na za aw ma? (*Ei za aw*) Tlâh nota nata tlâh lei nota chhao ano na deichhy aw ma? (*Ei deichhy aw*). Chapaw hropa zydua pathlua khaipa ta, ano deita na hrochhôn ta na hnei thlâh hâ aw ma? (*Ei hnei thlâh hâ aw*).

Kupatusana

Chakaotuhpa Pastor ta chanô ku chachah lâ la aw ta, chapaw ku chachah lâ a pie aw.

Ngâchhihna Bietaih

Nôvah awpenawh cha ama ku chachâh lâ rairi a patupa ta he a ry liata ngâchhihna Bietaihna he ama rei aw.

Chapaw Rei awpa

Keima (moh) _____, Nâma (moh) _____,
Ei lapinô châta ei cha pakia. Hneipa ta, vaipa ta,
pha viana lâ ma, pha lei viana lâ ma, tlâh nota nata
tlâh lei nota chhao, na kyh pachâ awpa ta, na châta
ngâchhih awpa ta, nâ palyupalih awpa ta, atanoh
tawhta thi noh maniah a pachhaina taihta,
Khazohpa raopa bie pathaihpa hawhta ei khohpa
vâta, ei ku ta na ku patupa ta bie liahsa ei châ taih.

Chanô Rei awpa

Keima (moh) _____, Nama (moh) _____,
Na lapinô châta eina pakia chi. Ei vahpa châta,
hneipa ta, vaipa ta, pha viana lâ ma, pha lei viana
lâ ma, tlâh nota nata tlâh lei nota chhao, na kyh
pachâ awpa ta, na châta ngâchhih awpa ta, nâ
palyupalih awpa ta, atanoh tawhta thi noh maniah
a pachhaina taihta, Khazohpa raopa bie pathaihpa
hawhta ei khohpa vâta, ei ku ta na ku patupata bie
liahsa ei châ taih.

Kusadi pakyna

*Kusadi hmâpa a châ khiatala kusadi cha
Biehrai chô liata sopa a châ aw. Chakaotuhpa ta
kuasadi cha la aw ta, chapaw hnohta a pie aw.
Chapaw chata kusadi cha la aw ta chanô ku*

chavei lâ tiazie (ring finger) liata a paky hai nota he a ry liata bie he a reih aw. Chanô chhaota cha hawhta chapaw cha a paky hra aw.

***He kusadi heta ei cha pakia.
Ei hneipa zydua ei cha hly.***

Byhnâ awna thlahchhâna

Nôvah penawhzy hmia achypa ta pakhu paneih aw ei ta, Chakaotuhpa ta ama luh chô liata ku chahniehpa ta thlahchhâna a hnei aw.

Hmiakhuna poh pahyna

Ahneina poh ahmâhpazy cha Myuhnei- tuhpa ta Myuthieh hmiakhuna poh cha thapha kawpa ta a pahy aw.

Moh Rona

Pastor hmiakô liata Myuhneituhpa, Myuthieh nata pahnokheituhpazy cha moh rona bu/marriage cerficate liata ama moh ama roh aw. Moh ro chhôh ta alykheina hlapy tlyma, hla sana hnei awpa a châ aw.

Phuahna nata Certificate piana

Atahmâ chapaw _____ nata chanô _____ cha MEC ta ahneipa Ahneina Ryhpa hawhta Khazohpa hmiakô nata nâmo apakhypazy mohmô liata ngâchhihna bie liahsa ama taih hawpa vâta ama pano cha a bao ta Nôvah ama châ haw, tahpa Paw, Sawchapawpa nata Thlahpa Pathaihpa moh ta ei phuah.

Chatawhta Dyhchâ Kupatuna Certificate cha nôvah zy lâta hlâ awpa a châ aw.

Khazohpa bie tawhta bietaena reina Alykheina nata Bietanazy

Pastor ta Chapaw nata Chanô zy nôvah ama châna a phuah khai nahta alykheina hlapy, sôlô nata hlasanazy, ahneina bietana reina zy, myuhneituhpa nata myuthieh chhôhkha tawhta alyna bie reinazy hnei pazao lymâ theipa a châ aw.

Zawpi hlasana nata Byhnâ awna

Alykheina hlasana zy, bietana zy reina a y khai tawhta zawpi aduapa ta hla sana y aw ta, Pastor byhnâ awna ta daihti pachhâsa awpa a châ.

Achhyna o tawhta puana

Pastor ta byhnâ awna a hnei khai tawhta, zawpi aduapa châ aw ta, pastor hmiasahpa ta myuhneituhpa, myuthieh nata pahno- kheituhpazy zydua achhyna o tawhta pua awpa a châ aw. Achhyna o hmia liata a duah aw ei ta, zawpi ta alykheina chibaih ama bu aw.

BO – 14

PARYHPAZY KUPATUSANA

Paryhpa ta kupatusana cha achhyna o hmâ pasaipa châ vei. Pastor o liata tlyma, Awnanopa hyutuhpa o liata tlyma kupatusapa a châ aw. A rypao khiatala, Local Standing Committee member zy, Akaona py luhpenaw zy, ahlah thei ei sala, Awnanopa Hyutuhpa nata Local Secretary cha amâ hlao cheingei awpa a châ aw. Pastor ta ku a patusa aw.

Hlasana nata Thlahchhâna

Atyunazy paryh khai tawhta Hlasana nata thlahchhâna a y aw.

Chakaotuhpa

Atahmâ chapaw _____ nata chanô _____ zy, namo he awnanopa ryhpa hawhta kupatusa awpa nama châ aw. Chavâta aly kaw pi ta, ABeipa moh ta kupatuna eima hnei aw.

Chapaw hnohta hiahrina

Moh

He chanô na lapinô châta na pakiapa he, Khazohpa raopa bie hawhta nôvah pathaihnykhy liata hmaohkha ta y awpa na kho ma? (*Ei khoh*). Ano kyh na pachâ aw ma? (*Ei pachâ aw*). Ano na palyupalih aw ma? (*Ei palyupalih aw*). Ano thlah na palôh aw ma? (*Ei palôh aw*). Tlâh no nata tlâh lei nota chhao ano na deichhy aw ma? (*Ei deichhy aw*). Chanô hropa zydua pathlua khaipa ta, ano deita na hrochhôn ta na hnei thlâh hâ aw ma? (*Ei hnei thlâh hâ aw*).

Chanô hnohta hiahrina

Moh

He chapaw ta a lapinô awpata a cha pakiapa he, nâ vahpa châta, Khazohpa raopa bie hawhta nôvah pathaina kyh liata hmaohkha ta y awpata na khoh ma? (*Ei khoh*). Ano bie na zyh aw ma? (*Ei zyh aw*). Ano na chakao aw ma? (*Ei chakao aw*). Ano kyh na pachâ aw ma? (*Ei pachâ aw*). Ano na za aw ma? (*Ei za aw*) Tlâh nota nata tlâh lei nota chhao ano na deichhy aw ma? (*Ei deichhy aw*). Châpaw hropa zydua pathlua khaipa ta, ano deita na hrochhôn ta na hnei thlâh hâ aw ma? (*Ei hnei thlâh hâ aw*).

Kupatusana

Chakaotuhpa Pastor ta chanô ku chachâh lâ la aw ta, chapaw ku chachâh lâ a pie aw.

Ngâchhihna Bietaih

Nôvah awpenawh cha ama ku chachâh lâ rairi a patupa ta he a ry liata ngâchhihna Bietaih he ama rei awpa a châ:

Chapaw Rei awpa

Keima (moh) _____, Nâma (moh) _____,

Ei lapinô châta ei cha pakia. Hneipa ta, vaipa ta, pha viana lâ ma, pha lei viana lâ ma, tlâh nota nata tlâh lei nota chhao, na kyh pachâ awpa ta, na châta ngâchhih awpa ta, nâ palyupalih awpa ta, atanoh tawhta thi noh maniah a pachhaina taihta, Khazohpa raopa bie pathaihpa hawhta ei khohpa vâta, ei ku ta na ku patupa ta bie liahsa ei châ taih.

Chanô Rei awpa

Keima (moh) _____, Nâma (moh) _____,

Na lapinô châta eina pakia chi. Ei vahpa châta, hneipa ta, vaipa ta, pha viana lâ ma, pha lei viana lâ ma, tlâh nota nata tlâh lei nota chhao, na kyh pachâ awpa ta, na châta ngâchhih awpa ta, nâ

palyupalih awpa ta, atanoh tawhta thi noh maniah a pachhaina taihta, Khazohpa raopa bie pathaihpa hawhta ei khoHPa vâta, ei ku ta na ku patupata bie liahsa ei châ taih.

Byhnâ awna thlahchhâna

Nôvah penawhzy cha pakhu paneih aw ei ta, Chakaotuhpa ta ama luh chahnaopa ta thlahchhâna a hnei aw.

Moh Rona

Pastor hmiakô liata nôvah nata pahno-kheituhpazy cha moh rona bu/Ahneina certificate liata ama moh ama ro awpa a châ.

Phuahna nata Certificate piena

Atahmâ chapaw _____ nata chanô _____ cha MEC ta ahneipa Ahneina Ryhpa hawhta Khazohpa hmiakô nata he sahlaozy mohmô liata ngâchhigna bie liahsa ama taih hawpa vâta ama pano cha a bao ta Nôvah ama châ haw tahpa Paw, Sawchapawpa nata Thlahpa Pathaihpa moh ta ei phuah.

Chatawhta Dyhchâ Kupatuna Certificate cha nôvah zy lâta hlâ awpa a châ aw.

Hlasana nata thlahchhâna

Chatawhta hlasana nata thlahchhâna hnei awpa a châ.

BO – 15

DEPARTMENT CHHIHTUHPAZY HLÂNA

KTP/ KNP/ KPP luhpazy châta atlypazy hlâna cha he hawhta a châ aw. Chakaotuhpa ta Luhpa hlâ awpa (zy) cha zawpi la aheipa ta paduasa aw ta, zawpi lâta ama chakaona awpa kyh hmia pahnosana a hnei aw. Cha khai tawhta he a ry liata bie ropa he a reih aw.

Kho châipa saih u, atahmâ khichhôn Awnanopa ryureina / Central Conference paryhsana hawhta he chyhsa (zy) he KTP/ KNP/ KPP luhpazy châ awpa ta hlâ awpa eimâ chhuah. Khazohpa Bie ta maniah a chhopa hawhta awnanopa chhihthatuhpa châ awpa ta cha, kyh to liata sahlaozy châta a mopâ tlâh châ awpa châ ta, cha hawna chata Krista nata Awnanopa cha ama chakao lymâ awpa a châ.

“Cha hawhna hra chata Awnanopa sahlao chakaotuhpazy cha chyhsa zachhihpa ama châ awpa a châ; reih hluhpa zy, Kresawhti parâpa zy, avyuhna puapa liata karâ ypa chyhsa zy ama châ awpa châ vei; ngiaryhna ryh leina pathaihpa ta ngiapâna bienyupa cha a pypa tiao ama châ awpa a châ (I Tim. 3:8-10).

Pasyuna bie reina nata Hiahrina

He khai tawhta ârypao khiahtala pasyuna bie chyupa reina hnei theipa a châ aw. Hlâ awpazy cha Maisâh lâ a heihpa ta a duah aw ei ta, Chakaotuhpa ta he ary liatahpa biehmia a rei khai tawhta hiahrina a hnei aw.

Department luhpa raihria chakao awpa cha, sahlaozy Khazohpa bie hawhta chhihtha awpa, Awnanopa tôhtlâh châ awpa, bao ngiahpa nata châhkhei ngiahpazy tiamâ ngaitapa ta chakao awpa, Awnanopa ta ahneipa Dâh nata Ryhpazy, Ryureina biezy zana chô ta, zi lymâ awpa a châ.

1. Hiahrina: Awnanopa liata he chakaona raihria awpata Khazohpa ta awpa na châ tahpa nâ pahno ma?

Achhyna: Ei pahno

2. Hiahrina: He chakaona liata a ngia awpa heta, Zisu Krista kyh na pachâpa vâta, Khazohpa rôhna nawpata chyhsa zydua pachha ama châ khai thei nawpa he na biepie chaipa a châ tahpa, na pathipalôh ta a cha pahnokhei ma?

Achhyna: Eina pahnokhei.

3. Hiahrina: Biehraiparohpanata Biehra Thiehpahé, Khazohpa bie châ ta, hé deita hé ngiapâna nata hmotaopa thliena dopa a châ tahpa nâ pyh ma?

Achhyna: Ei pyh.

4. Hiahrina: Mara Evangelical Church chhôh liata hé chakaona rai hé hria awpata awpa na châ tahpa angiapâpa ta nata apahnopa ta a ryhpa nata chhoreinazy apypa ta, hé Awnanopa liata nata awnanopa ta na chô liata biehnei awpata atlypazy lâta, Thâtihpha liata sawzy hawhta a ngiari lymâ awpata nâ pasaih lymâ aw ma?

Achhyna: Ei pasai lymâ aw.

Hlâna Thlahchhâna nata Akaona ku hlâna

Chakaotuhpa ta Hlâna thlahchhâna a hnei aw. Chatawha Chakaotuhpa ta, “ABeipa ta chakaona tha cha patlô mawh sy,” tahpa ta akaona ku chachâh lâ a hlâ aw.

BO – 16

KHICHHÔH MACHÂ PA-INA

Chakaotuhpa ta pa-i awpa (zy) cha zawpi la aheipa ta paduasa aw ta, zawpi lâta hmia pahnosana a hnei aw. Cha khai tawhta he a ry liata bie ropa he a reih aw.

Kho châipa sai u, atahmâ khichhôn Awnanopa ryureina paryhsana hawhta he chyhsa(zy) he khichhôn machâ châ awpa ta pa-i awpa eimâ chhuah. Khazohpa ta maniah a chhopa hawhta Khichhôn Machâ châ awpa ta cha, kyh to liata sahlaozy châta amopâtlâh cha awpa châ ta, cha hawna chata Krista nata Awnanopa cha ama chakao lymâ awpa a châ.

“Chahawhnahra chata Awnanopa sahlaio chakaotuh- pazy cha chyhsa zahchhihpa ama châ awpa a châ; reih hluhpa zy, Kresawhti parâpa zy, avyuhna puapa liata karâ ypa chyhsa zy ama châ awpa châ vei; ngiaryhna ryh leina pathaihpa ta ngiapâna bienyupa cha a pypa tiao ama châ awpa a châ. Chatawcha chazy chhao cha pasiapa ta y tua mawh sy; cha hnôlana chata a tla a châpa ama châ khiatala Awnanopa sahlaio chakaona raihria mawh

sy. Cha hawna hra chata chanôzy chhao chyhsa zachhihpa ama châ awpa a châ. Awnanopa sahlao chakaotuhpazy cha ama sawzy nata amo chhônkhâ khihsa asiapa ta pachâpa ta, lapinô pakha hneipa châ mawh sy. Awnanopa sahlao chakaona raihria a phapa ta a hria hawpazy chata â duana pha ngaitapa nata Krista Zisu liata ngiapâna kyh liana chata riahphana thata amosasyh ta a tao tyh ei ta (I Tim. 3:8-13).

Pasyuna bie reina nata Hiahrina

He khai tawhta â rypaoh khiahtala pasyuna bie chyupa reina hnei theipa a châ aw. Pa-i awpazy cha Maisâh lâ a heih aw ei ta, Chakaotuhpa ta he a ry liatahpa biehmia a rei khai tawhta hiahrina a hnei aw.

Khichhôn Machâ raihria chakao awpa cha, sahlaozy Khazohpa bie chho awpa, âbyuhna kyh liata Awnanopa machâzy bao lymâ awpa nata tlâh leipa mohônna zy, sipasapazy nata bao a ngiahpazy deichhyna kyh nata Thâtihpha chho pakawhna kyh zydua chhao ngâchhihpata tao lymâ awpa a châ.

1. Hiahrina: Awnanopa liata he chakaona raihria awpata Khazohpa ta awpa na châ tahpa nâ pahno ma?

Achhyna: Ei pahno.

2. Hiahrina: He chakaona liata a ngia awpa heta, Zisu Krista kyh na pachâpa vâta, Khazohpa rôhna nawpata chyhsa zydua pachha ama châ khai thei nawpa he na biepie chaipa a châ tahpa, na pathipalôh ta a cha pahnokhei ma?

Achhyna: Eina pahnokhei.

3. Hiahrina: Biehraiparohpa nata Biehraithiehpalthiehpahie, Khazohpa bie châ ta, he deita he ngiapâna nata hmotaopa thliena dopa a châ tahpa nâ pyh ma?

Achhyna: Ei pyh.

4. Hiahrina: Mara Evangelical Church chhôh liata he chakaona rai he hria awpata awpa na châ tahpa angiapâpa ta nata apahnopa ta a ryhpa nata chhoreina zy apypa ta, he Awnanopa liata nata awnanopa ta na chô liata biehnei awpata atlypazy lâta, Thâtihpahliata sawzy hawhta a ngiari lymâ awpata nâ pasaih lymâ aw ma?

Achhyna: Ei pasaih lymâ aw.

Pa-ina

Pa-i awpazy cha maisâh hmia liata pakhu paneih aw ei ta, Chakaotuhpa ta ama luh chô liata ku pahnieh aw ta, a ry liata ropa bie he a reih aw.

Moh Khazohpa Bie nata Mara Evangelical Church Assembly ta ryhpa a hneipa hawhta Paw nata Sawchapawpa nata Thlahpa Pathaihpa moh ta na (mo) he khichhôn Machâ châ awpata ei cha pa-i (ei).

Thlahchhâna nata Akaona ku hlâna

Chakaotuhpa ta thlahchhâna a hnei aw. Chatawhta Khichhôn Machâ ta pa-ipa (zy) cha a duah aw ta, Chakaotuhpa ta, “ABeipa ta chakaona tha cha patlô mawh sy,” tahpa ta akaona ku chachâh la a hlâ aw.

BO – 17

AWNANOPA MACHÂ CHAHNAONA

Chakaona hnei hlâta, Chakaotuhpa ta chahnaona kyh liata âbyuhpa zydua zawpi apakhy hlâta, a patohpatia khai awpa a châ. Chakaotuhpa ta chahnao awpazy cha zawpi lâ a heipa ta paduasa aw ta, hmia- pahnosana a hnei aw.

Zawpi lâta Bie hiahrina

Kho chaipa saih u, Khazohpa ta paryhsa sala, he chyhsa (zy) he Awnanopa Machâ (zy) châ awpa ta chahnao eimâ chhuah. Khazohpa ta maniah a chhopa hawhta Awnanopa machâ châ awpa ta cha, kyh to liata sahlaozy châta a mopâtlah châ awpa châ ta; Chahawna chata Krista nata Awnanopa cha ama kao lymâ awpa a châ. Keimo ta la tloh leipa pi ta, chahrasala eima tlohna cha Khazohpa a châ tahpa a thei thlâhâna chôta he chyhsa (zy) he Awnanopa Machâ châta chahnao awpa ta a pakhâna nama pahno khiahtala atahmâ tlai palâhâh teh u.

Buakha a chalih awpa châ aw ta, pakhâna reipa a y leipa khiahtala, Chakaotuhpa ta he hawhta a reih aw.

“Chahnao tlâh a (ama) châ tahpa a ngiapâ pi ta, Khazohpa hnohta rônahna y mawh sy!”

Thlahchhâna

Atotaotheipa Khazoh, nâma cha hmo phapa zydua a pietuhpa châ chi ta, na Thlahpa Pathaihpa hmâpa ta na Awnanopa liata chakaona nanopazy y awpata na rao haw. Atahmâ he chyhsa (zy) he Awnanopa machâ raihria awpata na awpa (ei) he na Awnanopa thapatlô nawpa ta nata na moh a rônah thei nawpa ta bie nata a (ama) hrozie phapa ta pamosapa ta na Thâtihpha hmeiseihna cha a chabapa ta, na Thlahpa Pathaihpa tobina ta thaphana nata ngâchhihna kyh ta a (ama) cha chakao lymâ thei nawpata a (ama) chô liata na ngiachhiena byhnâ pie mah y. Eima Beipa Zisu Krista vâta. Amen.

Khazohpa Bie Pathaihpa Reina

Ei chakaotuhpa, ei duakheipa, ei tlypa, ei palôhrupa ta â ly ngaitapa he moh teh u, a chô liata ei Thlahpa ei soh haw. Zenitaizy lâta pie awpa ta a pachiana a pua khei aw. Awh leipa aw ta, a ao papua hra leipa aw ta, othlia liata a ao cha patheisa aw vei, a pachiana cha bie hmeihseihpa ta a puakhei aw. Ano cha thazeih leipa aw ta, hnabeidyhpa ta y hra aw vei; a lei liana heta pachiana a pa-ysa hlâ lei cha; chatawcha liapahlôzy chata a ryhpa bie cha ama hâ thlâh hâ aw.

Khazohpa ta he tana heta a tah: “Kei ABeipa heta siana ta ei cha aw, na ku patu aw na ta ei cha hrôbieh aw, mochaopazy mo pavâsa aw na ta, atâhpazy atâhna tawhta papua awpata nata zohna hryta a tyuhpazy patâhna tawhta papua awpata chyhsazy biehraihna châta nata Zenitaizy a pakhaituhpa châta ei cha rao (Is. 42:1-7).”

Ahyrai awnanopa Hyutuhpa a châ khohpa ta cha raihria phapa a khoh, tahpa he â do. Chatanachata awnanopa hyutuhpa cha seinâ hnei leipa, lapinô pakha a hneipa, a sohsi theipa, palôhrupa dopa, chyhsa siapa, chyhsa papyupahly a thaipa, pachu a thaipa, kresawti pari a hmâh leipa, chyhsa tu a hmâh leipa, chyhsa nônaipa tlaô a châ awpa a châ. Ahryu khoh leipa, tâkâ sôh tlaichhai leipa, zachhih ngaitapa ta sawzy mohôhpa ta ano chhôhkha khihsa a siapa ta a pachâ thaipa chyhsa a châ awpa a châ; chyhsa ta ano chhôhkha khihsa hmâhta a siapata a pachâ thei tlôh leipa khahta cha kheih ta e Khazohpa awnanopa sahlao a mohôh thei aw? Ngiapâ thiehpâ chyhsa a châ awpa châ vei, chata leipatala a palaipa ta y aw ta, ahripa thalei châna cha a to pathlei aw na; chazy leipa chhao cha khôtho lâta chyhsazy reithaipa ta a y hra awpa a châ, chata leipata la reipachhiepa ta ypa ta ahripa khoheih liata a ao pathlei aw na (I Tim. 3:1-7).

Pasyuna bie reina

Pasyuna bie chyuta reipa a châ khai tawhta zawpi aduapa ta Apostol bie ngiapâpa bie reihpa a châ.

Apostôlzy Bie Ngiapâpa

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khaiâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpa nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa moto a pahlypa zy, mopathaih penawh akaona zy, molei ngiahthaina zy, pôhpa thyuheihna zy, chhâzaw hrona chhao ei ngiapâ. Amen.

Chahnao awpazy cha aduapa ta maisâh lâta a heih aw ei ta, Chakaotuhpa ta a ry liata bie hiahriana hnei aw ei ta zawpi thei khaiâpa ta amâ chhy awpa a châ.

1. Hiahriana: Awnanopa Machâ raihria châta a tlypa cha Awnanopa liata chakao ta, sahlaozy Khazohpa bie chho awpa a châ. Abeipa Zâpati chakaona liata zy, Awnanopa ry liata py a ypazy mohôhna kyh liata zy, Awnanopa laiseih lyma n'awpata deichhyna kyh liata zy, a lypazy a lykhei ta, pachârôhpazy pachârôh kheina kyh liata zy nata Awnanopa chakaona hropazy liata Pastor zy hrialah lymâ awpa a châ; âbyuhna kyh liata cha athihpa pabuna zy, Abeipa lâta sawhlâna zy nata Awnanopa machâzy tao thei awpa ta Assembly ta a pasaipa maih cha hria awpa a châ. Atlâh leipa mohôhna, sipasapazy nata bao a ngiapâzy deichhyna, Thâtipha chho pakawhna nata taohriana kyh liata Awnanopazy amopâtlah châpa ta chakao lymânazy he Khazohpa ta a cha aw chhâpa châ ta, na patlô awpazy cha a châ. He chakaona raizy hria awpata Khazohpa ta a cha awpa ta na pahno ma?

Achhyna: Ei pahno.

2. Hiahrina: He chakaona liata a ngia awpa heta, Zisu Krista kyh na pachâpa vâta, Khazohpa rôhna nawpata chyhsa zydua pachhah ama châ khai thei nawpa he na biepi chaipa a châ tahpa, na pathipalôh ta a cha pahnokhei ma?

Achhyna: Eina pahnokhei.

3. Hiahrina: Biehraï Parohpa nata Biehraï Thiehpa he Khazohpa bie châ ta; he deita he ngiapâna nata hmotaopa thliena dopa a châ tahpa nâ pyh ma?

Achhyna: Ei pyh.

4. Hiahrina: Khazohpa pakha deita y ta, Ano deita cha achhy awpa a châ. Ano châ Thlahpa, Ano khota a vaw ypa, su to liata a ypa, thlahpa hropa zydua nata hmo hropa zydua hlâta ananopa châ ta, a yzie liata chhâna a hnei leipa, chhâzaw ta a ypa, anano thei leipa châ ta, sona, hmotaotheina, pathaina, adona, phana, hmeiseihna nata kyhpachâna a châ tahpa nâ ngiapâ ma?

Achhyna: Ei ngiapâ.

5. Hiahrina: Khazohpa liana chata manôh pathôh Paw nata Sawchapawpa nata Thlahpa Pathaihpa y ei ta, ama pathôh heta, Khazohpa pakha, châna su kha, hmotaotheina nata rônahna liata âkhopa sai ama châ tahpa nâ ngiapâ ma?

Achhyna: Ei ngiapâ.

6. Hiahrina: Khazohpa, alei, avâ nata a chhoh liata hmo zydua taotuhpa chata, Chyhsapa chapaw nata chanô, pahnona, adona nata pathaina liata, ano lyupata tao ta, chyhsa zydua thyuna miakha nata unawh sai ama châ, tahpa nâ ngiapâ ma?

Achhyna: Ei ngiapâ.

7. Hiahrina: Apostolzy bie ngiapâpa he, ngiapâna dopa pabohsa nawpata nata a châhkhei nawpa ta Khazohpa châbu Pathaihpa a tlychakapa ta ropa a châ, tahpa na pyh ma?

Achhyna: Ei pyh.

8. Hiahrina: Khazohpa châbu Pathaihpa reina nata achuna kyh liata phahnai nâ ngiah lymâ aw ma?

Achhyna: Abeipa baona ta phahnai ei ngiah lymâ aw.

9. Hiahrina: Chyhsa to lâta Thâtihpha chho awpa ta Khazohpa ta na hnoh ta thaina a cha piepa cha, na pa-ia lymâ aw ma?

Achhyna: Abeipa baona ta ei pa-ia lymâ aw.

10. Hiahrina: Krista Awnanopazy amopâtlâh châ awpa ta na chhôhkha zydua chhihthahpa ta thlahchhâna kyh liata phahnai khâ a ngiah lymâ awpata nâ chhuah ma?

Achhyna: Abeipa baona ta ei chhuah.

11. Hiahrina: Mara Evagelical Church chhoh liata he chakaona rai he hria awpata awpa na châ tahpa a ngiapâpa ta, a ryhpa nata chhoreina zy a pyhpa ta, he Awnanopa ta na chô liata biehei awpata a tlypazy lâta Thâtihpha liata sawzy hawhta a ngiari lyma awpata nâ pasai lymâ aw ma?

Achhyna: Abeipa baona ta ei pasaih lyma aw.

Chahnaona

Chahnao awpa (zy) cha maisâh hmia liata pakhu paneih aw ei ta, Chakaotuhpa ta a (ama) luh chô liata ku a pahnieh aw. Cha tawhta Chanaotuhpa ta a ry liata ropa bie he a reih aw.

Moh, Khazohpa Bie nata Mara Evangelical Church Assembly ta Chahnaona Ryhpa a hneipa hawhta Khazohpa Awnanopa sahlaozy liata Awnanopa Machâ châ awpa ta Paw nata Sawchapawpa nata Thlahpa Pathaihpa moh ta ei cha chahnao.

Thlahchhâna

Chakaotuhpa ta chahnaopa (zy) châta byhnâ awna thlahchhâna a ry lia hawhta a hnei aw.

Hy Beipa, atahmâ, na Awnanopazy mohôh ta, deichhy awpa ta na awpa (zy) (moh) eima chahnaopa (penaw) he na Thlahpa Pathaihpa ta tobi la, sonazy piepata tha patlô (chyu) mah y. Na Awnanopa liata a (ama) tao awpazy cha palôhrupa adopa nata a-ipa hneina chôta tao lymâ awpa ta bao (ei) la, rairuna kyh liata chhao hnabeidy leipa ta nata chi leipa ta a (ama) y lyma thei nawpa ta bao (chyu) mah y. Eima Beipa Zisu Krista vâta. Amen.

Biehneina Hlâna

Chahnaopazy cha Biehneina la awpa ta â (amâ) duah aw. Chakaotuhpa ta Biehrâi ku kârano ta patusapa ta he biehneina hlâna bie he a reih aw.

Awnanopa Machâ (*moh*), Mara Evangelical Church: Assembly ta Awnanopa Machâ (*zy*) ta chakao awpa ta biehneina a piepa zydua cha âbyuhna hawhta na chakao lymâ thei nawpa ta, Khazohpa nata he apakhypenawh mohmô liata Krista mietakuzy pasa awpa ta biehneina ei cha pie.

Phuahna nata Akaona Ku Hlâna

Atahmâ (*moh*) Cha Khazohpa Bie nata MEC ta ahneipa Chahnaona Ryhpa hawhta atanoh Tari.... Noh ta Awnanopa Machâ châta Chahnaopa a châ haw, tahpa Paw nata Sawchapawpa nata Thlahpa Pathaihpa moh ta ei phuah.

Chatawhta Chakaotuhpa (zy) ta ABeipa Zisu Krista moh ta akaona ku chachâh lâ hlâ aw ei ta, “ABeipa ta byhnâ cha pie mawh sy” tah awpa a châ aw.

Hla sana

Daihti mopâpa ta zawpi a duapa ta hlasana a y aw.

Byhnâ Awna (Benediction)

Eima Beipa Zisu Krista ngiachhiena nata Khazohpa eima Paw kyhpachâna nata Thlahpa Pathaihpa akaona Byhna cha eima zydua hnohta tlyzaw ta y mawh sy. Amen.

BO – 18

EVANGELIST HLÂNA/PA-INA

Chakaotuhpa ta chakaona kyh liata hmo byuhpa zydua zawpi apakhyna hnei hlâta a patohpatia khai awpa a châ. Cha khai tawhta atyuh hmâhta Zawpi ta hla sa aw ei ta, hla sa chhôh ta Pastor (zy) tlyma, Awnanopa Machâ (zy) tlyma ta Home Evangelist ta hlâ awpa /Evangelist ta pa-i awpazy cha Achhyna o chhôh lâta a (ama) vaw chhihtha aw. Pa-i awpazy cha zawpi la aheipata paduasa aw ta, hmia pahnosana a hnei aw. Cha khai tawhta he bie he a reih aw.

Chakaotuhpa

Kho chaipa saih u, Khazohpa ta paryhsa sala, he chyhsa (zy) he Evangelist (zy) châ awpata pa-i awpa eimâ chhuahta vâta Abeipa lâta thlahchhâ ei suh u.

Thlahchhâna

Chakaotuhpa ta a ry liata ropa hawhta tlyma, ano khona zie hawhta tlyma thlahchhana a hnei aw.

Atotaotheipa Khazohpa, nâma cha hmo phapa zydua a pietuhpa châ chi ta, na Thlahpa Pathaihpa hmâpa ta na Awnanopa liata chakaona kyh nanopazy y awpa ta na rao haw. Atahmâ, he chyhsa (zy) Evangelist raihria awpata na awpa (ei) he na Awnanopa thapatlôh nawpa ta bie nata a (ma) hrozie phapa ta pamosapa ta, na Thâtihpha hmeiseihna kyh cha a chabapa ta na Thlahpa Pathaihpa tobina vâta thaphana nata ngâchhihna kyh ta a (ma) chakao lymâ thei nawpa ta a (ma) chô liata na ngiachhiena byhnâ pie mah y. Eima Beipa Zisu Krista vâta. Amen.

Khazohpa Bie Nahthliena

Châhrasala zawpizy cha a hmô nahta, Sâh hria awpa hlul kaw ta, chahrasala hriatuhpazy ama chyh. Chavâta sahria Beipa hnohta, sâh hria awpa ta hriatuhpazy a vaw tua naw thei nawpa ta hiah teh u,” tah ta (Mt. 9:36-38).

Namo ta, ‘sâh hria â daih nawpa ta thla palih â byuh,’ tah vei chi ma? Nahthlie teh u, ei cha chho ei hih, sai ula lyu zy moh teh u, atahmâ bawlaw ta hriapa ta a maih haw (Zh. 4:35).

Zisu ta ama hnoh ta, “keima he lâthlôh nata hmeiseihna nata hrona ei châ, keima lâta a sie leipa cha ahyhmâ ta Paw lâta tlô beih vei ei, tah ta (Zh. 14:6).

Chatawhta ama hnoh ta, “khizaw zydua liata sie ula, hmotaopa zydua hnohna chata Thâtihpha he chho teh u. A ngiapâpa ta bâti a châpa cha pachhapa ta y aw ta, a ngiapâ leipa deikua cha thai lei châpa ta ama y aw.” (Mk. 16:15-16).

Pasyuna bie reina

Pasyuna bie chyuta reipa a châ khai tawhta zawpi aduapa ta Apostol-zy Bie Ngiapâpa reihpa a châ.

Apostolzy Bie Ngiapâpa

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khaipâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpa nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa moto a pahlypa zy, mopathaih penawh akaona zy, molei ngiahthaina zy, pôhpa thyuheihna zy, chhâzaw hrona chhao ei ngiapâ. Amen.

Pa-i awpazy cha aduapa ta maisâh lâta a heih aw ei ta, Chakaotuhpa ta a ry liata bie hiahrianazy hnei aw ta, zawpi thei khaipa ta amâ chhy lymâ awpa a châ.

1. Hiahrina: Khazohpa liana cha ta, manôh pathôh, Paw, Sawchapawpa nata Thlahpa Pathaihpa a y, tahpa nâ ngiapâ ma?

Achhyna: Ei ngiapâ.

2. Hiahrina: Biehrail parohpa nata Biehrail thiehpa he Khazohpa bie hmeiseihpa châ ta, he bie pachupa he chyhsazy ama moleina siesaipa ta Khazohpa lâ a chhi thei tahpa nâ (namâ) ngiapâ ma?

Achhyna: Ei ngiapâ.

3. Hiahrina: Krista Biehmeiseihpa pahnosana kyh liata eima Missionary nata Awnanopa Nôpawpa-zy pachuna hawhta ngâchhih pa ta khâ na (nama) pachu laih lyma awpa ma?

Achhyna: Khazohpa baona ta liahsa ei pachu lymâ aw.

4. Hiahrina: Krista leipa ta pachhana rai y vei. Pachhana châta khapahmâh ei tao thei awpa rai y vei. Zisu Krista chata

Kraws liata a tao khai haw. Zisu Krista a ngiapâ ta moleina ro awpa deita âbyuh, tahpa nata ahryrai ano a ngiapâpa maih chhazaw hrona ama hnei, cha pachhana hrona cha ano liata ngiapâtuha zydua hnohta Khazohpa hmosaipa piepa, ano ngiachhiena kyh a châ, tahpa hmeiseihna ta pachu awpa ta bie liahsa nâ (namâ) taih ma?

Achhyna: Khazohpa baona ta liahsa ei taih.

5. Hiahrina: Apostolzy Bie Ngiapâpa nata Nicea Bie Ngiapâpazy he ngiapâna pabohsa nawpa nata achâhkhei nawpa ta Khazohpa châbu Pathaiha a tlychakapa ta ropa a châ tahpa nâ pyh ma?

Achhyna: Ei pyh.

6. Hiahrina: Zisu Kristatamaniah a chhopa hawhta Awnanopazy ta Sacrament (hmo â napa) sâno tao awpa hnei pie ta, chazy cha Bâtina nata Abeipa Zâpatizy he a châ tahpa nâ pyh ma?

Achhyna: Ei pyh.

7. Hiahrina: Krista Awnanopazy lâta a mopâ tlâh châ awpa ta na chhôhkha zydua chhihthapa ta, Thlahchhâna kyh liata chhao phahnai khâ a ngiah lymâ awpata nâ chhuah ma?

Achhyna: ABeipa baona ta ei chhuah.

8. Hiahrina: Mara Evangelical Church chhoh liata he chakaona rai he hria awpa ta awpa na châ tahpa a ngiapâpa ta nata a pahnopa ta a ryhpa nata chhoreina zy, a pypa ta he chakaona he patlô awpata bie liahsa nâ taih ma?

Achhyna: ABeipa baona ta ei taih.

Pa-ina

Pa-i awpazy cha maisâh hmia liata pakhu paneih aw ei ta, Chakaotuhpa ta ama luh chô liata ku pahniehpa ta, a ry liata ropa bie he a reih aw.

Moh, Khazohpa Bie nata Mara Evangelical Church Assembly ta paryhsana zie hawhta Khazohpa Awnanopa sahlaozy liata Evangelist châ awpa ta Paw nata Sawchapawpa nata Thlahpa Pathaihpa moh ta ei cha pa-i.

Thlahchhâna

Chakaotuhpa ta pa-ipa (zy) châta Byhnâ awna thlahchhâna a hnei aw.

Phuahna nata Akaona Ku Hlâna

Atahm (moh) cha Khazohpa Bie nata MEC ta ahneipa Ryhpa hawhta atanoh Tari Noh ta Evangelist châta pa-ipa a châ haw, tahpa Paw nata Sawchapawpa nata Thlahpa Pathaihpa moh ta ei phuah.

*Chatawhta Chakaotuhpa (zy) ta ABeipa Zisu Krista moh ta akaona ku chachâh lâ hlâ aw ei ta, “**ABeipa ta byhnâ cha pie mawh sy**” tah awpa a châ aw.*

Hla sana

Daihti mopâpa ta zawpi a duapa ta hlâ sana a y aw.

Byhnâ Awna

Eima Beipa Zisu Krista ngiachhiena nata Khazohpa eima Paw kyhpachâna nata Thlahpa Pathaihpa akaona cha eima zydua hnohta atahmâ tawhta tlyzaw ta y mawh sy. Amen.

BO – 19

MISSION PASTOR CHAHNAONA

Chakaotuhpa ta chakaona kyh liata hmo byuhpa zydua zawpi apakhyna hnei hlâta a patohpatia khai awpa a châ. Cha khai tawhta atyuhpa ta Zawpi ta hla sa aw ei ta, hla sa chhôh ta Pastor (zy) tlyma, Awnanopa Machâ (zy) tlyma ta chahnao awpazy cha Achhyna o chhôh lâta a (ama) vaw chhihtha aw. Chahnao awpazy cha zawpi la aheipata paduasa aw ta, hmia pahnosana a hnei aw. Chatawhta he bie he a reih aw.

Zawpi lâta bie hiahrina

Kho chaipa saih u, Khazohpa ta paryhsa sala, he chyhsa (zy) he Mission Pastor (zy) châ awpata chahnao eima chhuah.

Awnanopa pachiana liata cha he chyhsa he Mission pastor chahnao awpa ta a pakhâna pahno mapi. Nâmo zawpi lâta deikua cha Awnanopa ryhpa hawhta chahnao thei lei awpa ta pakhâna kheihawhpa tlyma nama pahno khiahta cha, atahmâ Khazohpa moh ta thlai nama phuah awpa ta pahnosapa nama châ.

Buakha a chalihpa châ aw ta, pakhâna reipa a y leipa khihtala, Chakaotuhpa he hawhta a reih aw.

Chahnao tlâh a (ma) châ tahpa a ngiapâ pi ta, Khazohpa hnohta rônahna y mawh sy.

Thlahchhâna

Chakaotuhpa ta a ry liata ropâ hawhta tlyma, ano khona zie hawhta tlyma thlahchhâna a hnei aw.

Atotaotheipa Khazohpa, nâma cha hmo phapa zydua a pietuhpa châ chi ta, na Thlahpa Pathaihpa hmâpa ta na Awnanopa liata chakaona kyh nanopazy y awpa ta na rao haw. Atahmâ, he chyhsa (zy) he Mission Pastor raihria awpata na awpa (ei) he na Awnanopa thapatlô nawpa ta bie nata a (ma) hrozie phapa ta pamosapa ta, na Thâtihipha hmeiseihna kyh cha a chabapa ta na Thlahpa Pathaihpa tobina vâta thaphana nata ngâchhihna kyh ta a (ma) chakao lymâ thei nawpa ta a (ma) chô liata na ngiachhiena byhnâ pie mah y. Eima Beipa Zisu Krista vâta. Amen.

Khazohpa Bie Nahthliena

Chatawcha a pachup'enawh zy hnohta, sâh hria awpa hluh kaw ta, châhrasala hriatuhpazy ama chyh. Chavâta sahria Beipa hnohta, sâh hria awpa ta hriatuhpazy a vaw tua thei nawpa ta hiah teh u," tah ta (Mt. 9:36-38).

Nâmo ta, ‘sâh hria â daih nawpa ta thla palih â byuh,’ tah vei ei chi ma? Nahthlie teh u, ei cha chho ei hih, sai ula lyu zy moh teh u, atahmâ bawlaw ta hria awpa ta a maih haw (Zh. 4:35).

Zisu ta ama hnoh ta, “keima he lâthlôh nata hmeiseihna nata hrona ei châ, keima lâta a sie leipa cha ahyhmâ ta Paw lâta tlô beih vei ei, tah ta (Zh. 14:6).

Khazohpa awnanopa sahlao, ano thisaih ta a chaleipazy cha pasa awpa ta, nâmo nata nama sahlao zydua chô liana chata a chado teh u; Thlahpa Pathaihpa ta ama chôta hyutuhpa ta a cha tao ei hih (Ht. 20:28).

A cha aw chhâna hnabeiseihna miakha ta awpa nama châpa hawna khata, pôhpa miakha nata Thlahpa miakha deita y ta, abeipa pakha, ngiapâna miakha, bătina miakha, ato Khazohpa nata Paw pakha deita y ta; ano cha ato chô liata y ta, ato chahryh khaiya ta, ato chhôn liata a y hrapa a châ. Chakaona raihria awpa ta thokha cha apôstôl châ awpa ta, thokha cha hrohsopa, thokha cha Thătihpha chhotuhpa nata thokha cha awnanopa pasatuhpa-pachutuhpa châ awpa ta a rao (Eph. 4:4-7, 12-13).

Chatanachata sie ula, photo pachupazy ta tao ula, Paw nata Sawchapawpa nata Thlahpa Pathaihpa moh ta bătî teh u; bie ei cha piepa zydua

kha a vaopa ta pachu teh u; nahthlie teh u, chhâzaw chhâna taihta nama hnota ei y thlah ha aw. Khizaw chhana taih chhaota,' Amen (Mt. 28:19-20).

Pasyuna bie reina

Pasyuna bie chyuta reipa a châ khai tawhta zawpi aduahpa ta Apostol-zy Bie Ngiapâpa reihpa a châ.

Apostôlzy Bie Ngiapâpa

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khaipâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpa nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa moto a pahlypa zy, mopathaih penawh akaona zy, molei ngiahthaina zy, pôhpa thyuheihna zy, chhâzaw hrona chhao ei ngiapâ. Amen.

Chahnao awpazy cha aduapa ta maisâh lâta a heih aw ei ta, Chakaotuhpa ta a ry liata bie hiahrianazy hnei aw ta, zawpi thei khaipa ta amâ chhy awpa a châ.

1. Hiahrina: Khazohpa lianacha ta, manôh pathôh, Paw, Sawchapawpa nata Thlahpa Pathaihpa y ei ta, ama pathôh heta Khazohpa pakha, châna su kha, hmotaotheina nata rônahna liata âkhopa sai ama châ tahpa nâ ngiapâ ma?

Achhyna: Ei ngiapâ.

2. Hiahrina: Biehraï parohpa nata Biehraï thiehpa he Khazohpa bie hmeiseihpa châ ta, he bie pachupa he chyhsazy ama moleina siesaipa ta Khazohpa lâ a chhi thei tahpa nâ (namâ) ngiapâ ma?

Achhyna: Ei ngiapâ.

3. Hiahrina: Krista Biehmeiseihpa pahnosana kyh liataeima Missionary nata Awnanopa Nôpawpa-zy pachuna hawhta ngâchhihpa ta khâ na (nama) pachu laih lyma awpa ma?

Achhyna: Khazohpa baona ta liahsa ei pachu lymâ aw.

4. Hiahrina: Krista leipa ta pachhana rai y vei. Pachhana châta khapahmâh ei tao thei awpa rai y vei. Zisu Krista chata Kraws liata a tao khai haw. Zisu Krista a ngiapa ta moleinazy ro awpa deita âbyuh, tahpa nata ano a ngiapâpa maih chhazaw hrona ama hnei, cha pachhana hrona cha ano liata ngiapâtuha zydua hnohta Khazohpa hmosaipa piepa, ano ngiachhiena kyh a châ, tahpa hmeiseihna ta pachu awpa ta bie liahsa nâ (namâ) taih ma?

Achhyna: Khazohpa baona ta liahsa ei taih.

5. Hiahrina: Krista Awnanopa sahlao Mission Pastor vaw châ tita, he pachuna bie he pachu lai h lymâpa ta nâ (nâmo) nata chakaona raihria byuha – Bâtina, Abeipa Tlâhkhai chakaona, Saw hlâna, Nôvah kupatusana, Athihpa pabuna nata chakaona hropazy liata ngâchhih ngaitapa ta Mara Evangelical Church ta a hneipa ryhpa nata a ryureina bie zyna chôta chyhsa molaipa tlyma, mo chyhpa la tlyma, pho laipa nata pho nawhpa lâta tlyma, abei nata machhie,

chapaw nata chanô hmia moh leipata na tao byuhpa nata rei byuhpa zydua âdopa ta Krista pheisaih riahphapa hawhta tao lymâ awpa bie liahsa nâ (mâ) taih ma?

Achhyna: Khazohpa baona ta liahsa ei taih.

6. Hiahrina: Apostôl zy biengiapâpa nata Nicea biengiapâpazy he ngiapâna pabohsa nawpa ta nata achâhkhei nawpa ta Khazohpa châbu Pathaihpa a tlychakapa ta ropa a châ tahpa nâ pyh ma?

Achhyna: Ei pyh.

7. Hiahrina: Zisu Kristata maniah achhopahawhta Krista Awnanopazy ta Hmo ânapa (sacrament) sâno tao awpa hnei pi ta, chazy cha Bâtina nata Abeipa Zâpatizy he a châ tahpa nâ pyh ma?

Achhyna: Ei pyh.

8. Hiahrina: Krista Awnanopazy lâta a mopâ tlâh châ awpa ta na chhôhkha zydua chhihthapa ta, Thlahchhâna kyh liata chhao phahnai khâ a ngiah lymâ awpata nâ chhuah ma?

Achhyna: ABeipa baona ta ei chhuah.

9. Hiahrina: Mara Evangelical Church chhôn liata

he chakaona rai he hria awpa ta awpa na châ tahpa a ngiapâpa ta nata a pahnopa ta a ryhpa nata chhoreina zy, a pypa ta he chakaona he patlô awpata bie liahsa na taih ma?

Achhyna: ABeipa baona ta ei taih.

Chahnaona

Chahnao awpazy cha maisâh hmia liata pakhu paneih aw ei ta, chahnaopa pastor (zy) ta ama luh chô liata ku ama pahnieh aw. Cha tawhta Chakaotuhpa ta a ry liata ropa bie he a reih aw.

Moh, Khazohpa Bie nata Mara Evangelical Church Assembly ta Chahnaona Ryhpa a hneipa hawhta Khazohpa Awnanopa sahlaozy liata Mission Pastor châ awpa ta Paw nata Sawchapawpa nata Thlahpa Pathaihpa moh ta ei cha chahnao.

Thlahchhâna

Chakaotuhpa ta chahnaopa (zy) châta Byhnâ awna thlahchhâna a ry lia hawhta a hnei aw.

Hy Beipa, Awnanopazy châta hmo byuhpazy a pachâtuha châ chi ta, na Awnanopa liata chakaona raizy cha hria awpata chyhsa hlupi na khoh; rainanopazy hria awpa ta chyhsa nanopazy na awpa vâta alyna bie eima reih. Atahmâ, na

Awnanopazy mohôh ta, deichhy awpata na awpa (zy), (moh zy.....s/o.... eima chahnaopa (penaw) he na Thlahpa Pathaihpa ta tobi la, sonazy piepata tha patlô (chyu) mah y. Na Awnanopa liata a (ma) tao awpazy cha palôhrupa adopa nata a-ipa hneina chôta tao lymâ awpa ta bao la, rairuna kyh liata chhao hnabeidy leipa ta nata chi leipa ta a (ma) y lymâ thei nawpa ta bao (chyu) mah y. Eima Beipa Zisu Krista vâta. Amen.

Biehneina Hlâna

Chahnaopa (zy) cha Biehneina la awpa ta a (ama) duah aw. Chakaotuhpa ta Biehrâi ku no ta patusapa ta he biehneina hlâna bie he a reih aw.

Pastor (moh), Mara Evangelical Church: Assembly ta Mission pastor zy chakao awpa biehneina a piepa zydua cha Awnanopa ryureina ta chakaona su a raopa maih liata Khazohpa bie ta Awnanopa pasapa nata ano khihnarâh châta Awnanopa liata hria âbyuhpa maih cha hria thei awpa ta atanoh (date)..... noh ta biehneina ei cha pie.

Chakaona Raoao (stole) pathlaina

Chakaotuhpa chata Chahnao thiehpa (zy) cha Mission Pastor ama châ haw, tahpa ngiâna châta Chakaoma raoao saihipa a pathlai aw.

Phuahna nata Akaona Ku Hlâna

Atahmâ (moh) cha Khazohpa Bie nata MEC ta ahneipa Chahnaona Ryhpa hawhta atanoh Tari Noh ta Mission Pastor châta Chahnaopa a châ haw, tahpa Paw nata Sawchapawpa nata Thlahpa Pathaihipa moh ta ei phuah.

Chatawhta Chakaotuhpa (zy) ta Zisu Krista moh ta akaona ku chachâh lâ hlâ aw ei ta, “ABeipa ta byhnâ cha pie mawh sy” tah awpa a châ aw.

Hla sana

Daihti mopâpa ta zawpi a duapa ta hlâ sana a y aw.

Byhnâ Awna

Eima Beipa Zisu Krista ngiachhiena nata Khazohpa eima Paw kyhpachâna nata Thlahpa Pathaihipa akaona cha eima zydua hnohta atahmâ tawhta tlyzaw ta y mawh sy. Amen.

BO – 20

PROBATIONARY PASTOR PA-INA

Chakaotuhpa ta chakaona kyh liata hmo byuhpa zydua zawpi apakhyna hnei hlâta a patohpatia khai awpa a châ. Chatawhta atyuh hmâhta Zawpi ta hla sa aw ei ta, hla sa chhôh ta Pastor (zy) tlyma, Awnanopa Machâ (zy) tlyma ta pa-i awpazy cha Achhyna o chhôh lâta a (ama) vaw chhihtha aw. Probationary Pastor châta pa-i awpazy cha zawpi lâ aheipata paduasa aw ta, hmia pahnosana a hnei aw. Chatawhta he bie he a reih aw.

Kho chaipa saih u, Khazohpa ta paryhsa sala, he chyhsa (zy) he Probationary Pastor (zy) châ awpata pa-i awpa eimâ chhuah. Khazohpa ta maniah a chhopa hawhta Probationary Pastor châ awpata cha, kyh to liata sahlaozy châta amopatlâh châ awpa châ ta; cha hawhna chata, Krista nata Awnanopa cha ama vaw chakao lymâ awpa a châ. Keimo ta la tloh leipa pita, chahrasala eima tlohna cha Khazohpa a châ tahpa a thei thlâhna chô ta Krista nata Awnanopa cha a (ama) chakao awpa a châ.

Thlahchhâna

Chakaotuhpa ta a ry liata ropa thlahchhâna tlyma, ano ta a khopa hawhta tlyma thlahchhâna a hnei aw.

Khazohpa Bie Nahthliena

“Mietaku sahlao vai awpa ta Khazohpa ta a cha piepa ei he, pakhâta ta mohôh teh u, hlao châta a hria chakhyhpa châ leipa ta Khazohpa khozie hawhta byuh ngaitapa nata khona hmeiseih hneipa ta hria muh vy. Nama sahlaozy chô liata a pabeisa khah u la, sahlaozy a mopâ tlâh tlaô châ teh u. Chatanachata Mietaku Vaituhpa Beichaipa â vaw luah tita palyupalihna Beilakho a lo thei leipa cha nama to aw. Nama zydua ta areisina ta a tobipa ta a chakao rairie teh u. ‘Khazohpa ta âpalaipazy a dyuh ta, âreisipazy deikua cha a ngiachhie tyh’ tahpa châ tlôh ta (I Pt. 5:2-5).

Chahasala zawpizy cha a hmô nahta, Mietakupa a vaituhpa a hnei leipa hawhta, ngiarohpa nata paipa ta ama ypa vâta a ngiachhie ngaita kaw ta. Chatawcha a pachup’enawh zy hnohta, Sâh hria awpa hluh kaw ta, chahasala hriatuhpazy ama chyh. Chavâta sahria Beipa hnohta, sâh hria awpa ta hriatuhpazy a vaw tuah thei nawpa ta hiah teh u,” tah ta (Mt. 9:36-38).

Zisu deikua cha ta, âmo sahlao cha aw ta, ama hnoh ta, ‘Zenitaizy chô liata ryureituhpa ta ama raopazy chata ama chôta a bei ngâsâ ei ta, ama molaipazy chata ama chô liata bie ama hnei ngasa tahpa nama pahno. Chahrasala nâmo hry liata deikua cha cha hawhpa châ aw vei. Ahyrai nama hry ta hmiatua chaipa nata a beichaipa ta a châ khoh khiata cha, chyhsa zydua sei ta a y awpa a châ. Chyhsa Sawchapawpa chhao tlai cha chakaopâ awpa ta a zu leipa ta, chakaotuhpa nata chyhsa hluhpi chatlaina awpa ta a hrona pie awpa ta a zupa châ tlôh ta,’ tah ta (Mk. 10:42-45).

Bie Hiahrina

Probationary Pastor châta pa-i awpa (zy) cha aduapa ta maisâh lâta a heih aw ei ta, Chakaotuhpa ta a ry liata bie hiahrinazy hnei aw ei ta zawpi thei khaipa ta ama chhy lymâ awpa a châ.

Atahmâ nâ (mo) he Mara Evangelical Church liata Pro. Pastor châta pa-i awpa eimâ chhuah. Awnanopa sahlao thlahchhâna cha Abeipa ta chyh-ei ta, he chakaona rai he hria awpa ta a ngiachhiena kyh ta awpa na (ma) châ. Chavâta Khazohpa ngiachhiena vâta he chakaona rai he patlô lymâ awpa ta nâ (mâ) hlâna kyh he

Khazohpa nata zawpi hmiakô liata nâ (ma) palâsa awpa a châ aw.

1. Hiahrina: Pastor raihria cha Krista Awnanopa mohôh ta Khazohpa Bie pathaihpa ta pasa lymâ awpa a châ. Awnanopa liata he chakaona raihria awpa ta Khazohpa ta a cha aw, tahpa nâ pahno ma?

Achhyna: Ei pahno.

2. Hiahrina: Pastor raihria cha Zisu Krista kyh na pachâpa vâta Khazohpa rônah nawpa ta chyhsa zydua pachha ama châ khai thei nawpa he na biepie chaipa a châ, tahpa na pathipalôh ta a cha pahnokhei ma?

Achhyna: Eina pahnokhei.

3. Hiahrina: Biehraï parohpa nata Biehraï thiehpa he Khazohpa bie châ ta, he deita he ngiapâna nata hmotaopa thliena dopa a châ tahpa nâ pyh ma?

Achhyna: Ei pyh.

3. Hiahrina: Khazohpa liana chata, manôh pathôh, Paw, Sawchapawpa nata Thlahpa Pathaihpa y ei ta, ama pathôh heta Khazohpa pakha, châna su kha,

hmotaotheina nata rônahna liata
âkhopa sai ama châ tahpa nâ ngiapâ
ma?

Achhyna: Ei ngiapâ.

5. Hiahrina: Apostolzy Bie Ngiapâpanata Nicea Bie
Ngiapâpazy he ngiapâna pabohsa
nawpa ta nata achâhkhei nawpa ta
Khazohpa châbu Pathaihpa a
tlychakapa ta ropa a châ tahpa nâ
pyh ma?

Achhyna: Ei pyh.

6. Hiahrina: Krista Awnanopazy lâta amopâ tlâh
châ awpa ta na chhôhkha zydua
chhihthapa ta, Thlahchhâna kyh liata
chhao phahnai khâ a ngiah lymâ
awpata nâ chhuah ma?

Achhyna: ABeipa baona ta ei chhuah.

7. Hiahrina: Mara Evangelical Church chhoh liata
he chakaona rai he hria awpa ta
awpa na châ tahpa a ngiapâpa ta nata
a pahnopa ta a ryhpa nata chhoreina
zy, a pypa ta he chakaona he patlô
awpata bie liahsa nâ taih ma?

Achhyna: ABeipa baona ta ei taih.

Pa-ina

Pa-i awpa (zy) cha maisah hmia liata pakhu paneih aw ei ta, Chakaotuhpa ta a (ama) luh chô liata ku pahnieh aw ta, a ry liata ropa bie he a reih aw.

Moh, Khazohpa Bie nata Mara Evangelical Church Assembly ta Pastor ta pa-ina Ryhpa a hneipa hawhta Khazohpa Awnanopa sahlaozy liata Probationary Pastor châ awpa ta Paw nata Sawchapawpa nata Thlahpa Pathaihpa moh ta ei cha pa-i.

Thlahchhâna

Chakaotuhpa ta pa-i awpa Probationary Pastor (zy) châta byhnâ awna thlahchhâna a hnei aw.

Biehneina Hlâna

Pa-ipa (zy) cha Biehneina lâ awpa ta amâ duah aw. Chakaotuhpa ta Biehrai ku no ta patusapa ta he biehneina hlâna bie he a reih aw.

Pastor (moh), Mara Evangelical Church: Assembly ta Probationary pastor zy ta chakao awpa biehneina a piepa zydua cha Awnanopa ryureina ta chakaona su a raopa maih liata Khazohpa bie ta Awnanopa pasapa nata ano khihnarâh châta Awnanopa liata hria âbyuhpa

maih cha hria thei awpa ta atanoh
(date) noh ta bieheina ei cha pie.

Chakaona Raoao (stole) paaona

Chakaotuhpa chata Probationary Pastor châta pa-ipa pastor a (ama) châ haw, tahpa ngiâna châta Chakaona Raoao (stole) râhpa a paa aw.

Phuahna nata Akaona Ku Hlâna

Atahma (moh) cha Khazohpa Bie nata MEC ta ahneipa Ryhpa hawhta atanoh Tari.... Noh ta Probationary Pastor châta pa-ipa a châ haw, tahpa Paw nata Sawchapawpa nata Thlahpa Pathaihpa moh ta ei phuah.

Chatawhta Chakaotuhpa (zy) ta Zisu Krista moh ta akaona ku chachâh lâ hlâ aw ei ta, “ABeipa ta byhnâ cha pie mawh sy” tah awpa a châ aw.

Hla sana

Daihti mopâpa ta zawpi a duapa ta hlâ sana a y aw.

Byhnâ Awna

Eima Beipa Zisu Krista ngiachhiena nata Khazohpa eima Paw kyhpachâna nata Thlahpa Pathaihpa akaona cha eima zydua hnohta atahmâ tawhta tlyzaw ta y mawh sy. Amen.

BO – 21

PASTOR CHAHNAONA

Chakaotuhpa ta chakaona kyh liata hmo byuhpa zydua zawpi apakhyna hnei hlâta a patohpatia khai awpa a châ. Chatawhta Zawpi ta atyuh hmahta hla sa aw ei ta, hla sa chhôh ta Pastor (zy) tlyma, Awnanopa Machâ (zy) tlyma ta Chahnao awpazy cha Achhyna o chhôh lâta a (ama) vaw chhihtha aw. Chahnao awpazy cha zawpi lâ a heihipa ta paduasa aw ta, hmia pahnosana a hnei aw. Chatawhta he bie he a reih aw.

Zawpi lâta bie hiahrina

Kho chaipa saih u, Khazohpa ta paryhsa sala, he chyhsa (zy) he Pastor(zy) châ awpata chahnao eimâ chhuah. Khazohpa ta maniah a chhopa hawhta Pastor châ awpata cha, kyh to liata sahlaozy châta a mopatlâh châ awpa châ ta; cha hawhna chata Krista nata Awnanopa cha ama chakao lymâ awpa a châ. Keimo ta la tloh leipa pita, chahrasala eima tlohna cha Khazohpa a châ tahpa a thei thlâh hâna chô ta he chyhsa (zy) he Pastor châta chahnao awpata a pakhâna nama pahno khiatala thlai palâhâh teh u.

Buakha a chalihpa châ aw ta, pakhâna reipa a y lei pa khihtala, Chakaotuhpa ta he hawhta a reih aw.

Chahnao tlâh a (ma) châ tahpa a ngiapâ pi ta, Khazohhpa hnohta rôhnahna y mawh sy.

Thlahchhâna

Chakaotuhpa ta a ry liata ropa thlahchhâna tlyma, ano ta a khopa hawhta tlyma, thlahchhâna a hnei aw.

Atotaotheipa Khazohpa, nâma cha hmo phapa zydua a pietuhpa châ chi ta, na Thlahpa Pathaihpâ hmâpa ta na Awnanopa liata chakaona kyh nanopazy y awpa ta na rao haw. Atahmâ, he chyhsa (zy) Pastor raihria awpata na awpa (ei) he na Awnanopa thapatlôh nawpa ta bie nata a (ma) hrozie phapa ta pamosapa ta, na Thatihpha hmeiseihna kyh cha a chabapa ta na Thlahpa Pathaihpâ tobina vâta thaphana nata ngâchhihna kyh ta a (ma) chakao lymâ thei nawpa ta a (ma) chô liata na ngiachhiena byhnâ pie mah y. Eima Beipa Zisu Krista vata. Amen.

Khazohpa Bie Nahthliena

Châhrasala zawpizy cha a hmô nahta, Mietakupa a vaituhpa a hnei leipa hawhta, ngiarohpa nata paipa ta ama ypa vâta a ngiachhie

ngaita kaw ta. Chatawcha a pachup'enawh zy hnohta, Sâh hria awpa hluh kaw ta, châhrasala hriatuhpazy ama chyh. Chavâta sahria Beipa hnohta, sâh hria awpa ta hriatuhpazy a vaw tua thei nawpa ta hiah teh u," tah ta (Mt. 9:36-38).

Nâmo ta, 'sâh hria â daih nawpa ta thla palih â byuh,' tah vei ei chi ma? Nahthlie teh u, ei cha chho ei hih, sai ula lyu zy moh teh u, atahmâ bawlaw ta hria awpa ta a maih haw (Zh. 4:35).

Zisu deikua cha ta, âmo sahlao cha aw ta, ama hnoh ta, 'Zenitaizy chô liata ryureituhpa ta ama raopazy chata ama chôta a bei ngâsâ ei ta, ama molaipazy chata ama chô liata bie ama hnei ngasa tahpa nama pahno. Châhrasala namo hry liata deikua cha cha hawhpa châ aw vei. Ahyrai nama hry ta hmiatua chaipa nata a beichaipa ta a châ khoh khiata cha, chyhsa zydua sei ta a y awpa a châ. Chyhsa Sawchapawpa chhao tlai cha chakao pâ awpa ta a zu leipa ta, chakaotuhpa nata chyhsa hluhpi chatlaina awpa ta a hrona pie awpa ta a zupa châ tlôh ta,' tah ta (Mk. 10:42-45).

Khazohpa awnanopa sahlao, ano thisaih ta a chaleipazy cha pasa awpa ta, nâmo nata nama sahlao zydua chô liana chata a chado teh u; Thlahpa Pathaihpa ta ama chôta hyutuhpa ta a cha tao ei hih (Ht. 20:28).

Chatanachata sie ula, photo pachupazy ta tao ula, Paw nata Sawchapawpa nata Thlahpa Pathaihpa moh ta bâti teh u; bie ei cha piepa zydua kha a vaopa ta pachu teh u; nahthlie teh u, chhâzaw chhana taihta nama hnohta ei y thlâh hâ aw. Khizaw chhâna taih chhaota,' tah ta (Mt. 28:19-20).

Pasyuna bie reina

Pasyuna bie chyupa rei khai tawhta zawpi aduapa ta Apostol zy Bie Ngiapâpa reihpa a châ.

Apostolzy Bie Ngiapâpa

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khaipâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpâ nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa moto a pahlypa zy, mopathaih penawh akaona zy, molei ngiahthaina zy, pôhpa thyuheihna zy, chhâzaw hrona chhao ei ngiapâ. Amen.

Chahnao awpazy cha a duapa ta maisâh lâta a heih aw ei ta, Chakaotuhpa ta a ry liata bie hiahrianazy hnei aw ei ta zawpi thei khaipa ta amâ chhy lymâ awpa a châ.

Awnanopa sahlao luhpa nata Beichaipa, eima Beipa Zisu Krista chata a pôhpa, Awnanopa he padua lymâ nawpa ta atahmâ nâ (mo) he Pastor châta chahnao awpa ta eimâ chhuah. Awnanopa sahlao thlahchhâna cha Abeipa ta chyh-ei ta, he chakaona rai he hria awpa ta a ngiachhiena kyh ta awpa na (ma) châ. Chavâta Khazohpa ngiachhiena vâta he chakaona rai he patlô lymâ awpa ta na (ma) hlâna kyh Khazohpa nata zawpi hmiakô liata na (ma) palâsa awpa a châ aw.

1. Hiahrina: Pastor raihria cha Krista Awnanopa mohôh ta Khazohpa bie pathaihpa ta pasa lymâ awpa a châ. Awnanopa liata he chakaona raihria awpa ta Khazohpa ta a cha aw, tahpa nâ pahno ma?

Achhyna: Ei pahno.

2. Hiahrina: Pastor raihria cha Zisu Krista kyh na pachâpa vâta Khazohpa rônah nawpa ta chyhsa zydua pachha ama châ khai thei nawpa he na biepi chaipa a châ, tahpa na pathipalôh ta a cha pahnokhei ma?

Achhyna: Eina pahnokhei.

3. Hiahrina: Biehraï parohpa nata Biehraï thiehpa he Khazohpa bie châ ta, he deita he ngiapâna nata hmotaopa thliena dopa a châ tahpa na pyh ma?

Achhyna: Ei pyh.

4. Hiahrina: Khazohpa pakha deita y ta, Ano deita cha achhy awpa a châ. Ano cha Thlahpa, Ano kho ta a vaw ypa, su to liata a ypa, thlahpa hropa zydua nata hmohropa zydua hlâta a nanopa châ ta, a yzie to lia raita, chhâna a hnei leipa chhâzaw ta a ypa, a nano thei leipa châ ta, hmotaotheina, pathaihna, adona, hmeiseihna nata kyhpachâna a châ, tahpa nâ ngiapâ ma?

Achhyna: Ei ngiapâ.

5. Hiahrina: Khazohpalianacha ta, manôh pathôh, Paw, Sawchapawpa nata Thlahpa Pathaihpa y ei ta, ama pathôh heta Khazohpa pakha, châna sukha, hmotaotheina nata rônahna liata âkhopa sai ama châ tahpa nâ ngiapâ ma?

Achhyna: Ei ngiapâ.

6. Hiahrina: Khazohpa, alei, avâ nata a chhôn liata hmo zydua taotuhpa cha ta, chyhsapa chapaw nata chanô, pahnona nata adona nata pathaihna liata Ano lyupa ta tao ta; chyhsa zydua he thyuna miakha nata unawh sietano sai ama châ, tahpa nâ ngiapâ ma?

Achhyna: Ei ngiapâ.

7. Hiahrina: Apostôl zy biengiapâpa nata Nicea Biengiapâpa zy he ngiapâna pabohsa nawpa ta nata achâhkhei nawpa ta Khazohpa châbu Pathaihpa a tlychakapa ta ropa a châ tahpa nâ pyh ma?

Achhyna: Ei pyh.

8. Hiahrina: Khazohpa Châbu Pathaihpa tamaniah a chhopa hawhta chyhsapa lâ tawhta hmotaopa vâta châ leipa ta, Khazohpa raona zie hawhta moleina ropa ta, Krista angiapâna vâ deita ta ngiachhie pachhapa eima châ tahpa nâ ngiapâ ma?

Achhyna: Ei ngiapâ.

9. Hiahrina: Zisu Kristata maniah a chhopa hawhta Krista Awnanopazy ta Hmo ânapa (sacrament) sânô tao awpa hnei pie

ta, chazy cha Bâtina nata Abeipa Zâpatizy he a châ tahpa na pyh ma?

Achhyna: Ei pyh.

10. Hiahrina: Krista Awnanopa sahlaozy cha Khazohpa kho viapa hawhta chhihtha ta, hrona viahchhâ ta pasa ta, pachutuhpa pakheipazy cha thailei pachâsa ta, riahpha ngaitapa ta a dyuh awpa ta, phahnai nâ ngiah lymâ aw ma?

Achhyna: Abeipa baona ta ei ngiah lymâ aw.

11. Hiahrina: Chyhsa to lâta Thâtihpha chho awpa ta Khazohpa ta theina na hnohta a cha piepa cha na paia lymâ aw ma?

Achhyna: Abeipa baona ta ei paia lymâ aw.

12. Hiahrina: Krista Awnanopazy lâta a mopâ tlâh châ awpa ta na chhôhkha zydua chhihthapa ta, Thlahchhâna kyh liata chhao phahnai khâ a ngiah lymâ awpata nâ chhuah ma?

Achhyna: Abeipa baona ta ei chhuah.

13. Hiahrina: Khazohpa Awnanopa pôhpalôhpa châta nata na Awnanopa châta chhao adyhna nata apôhkhana he na tlua lymâ aw ma?

Achhyna: Abeipa baona ta ei tlua lymâ aw.

14. Hiahrina: Mara Evangelical Church chhôn liata he chakaona rai he hria awpa ta awpa na châ tahpa a ngiapâpa ta nata a pahnopa ta a ryhpa nata chhoreina zy, a pypa ta he chakaona he patlô awpata bie liahsa nâ taih ma?

Achhyna: Abeipa baona ta ei taih.

Chahnaona

Zawpi adua khaipa ta, chahnao awpazy cha maisah hmia liata pakhu paneih aw ei ta, chahnaopa pastor (zy) ta ama luh chô liata ku ama pahnieh aw. Cha tawhta Chanaotuhpa ta a ry liata ropa bie he a reih aw.

Moh, Khazohpa Bie nata Mara Evangelical Church Assembly ta Chahnaona Ryhpa a hneipa hawhta Khazohpa Awnanopa sahlaozy liata Pastor châ awpa ta Paw nata Sawchapawpa nata Thlahpa Pathaihpa moh ta eimâ cha chahnao.

Thlahchhâna

Chakaotuhpa ta chahnaopa (zy) châta chahnaopa pa-ina nata byhnâ awna thlahchhâna a ry lia hawhta a hnei aw.

Hy Beipa, Awnanopazy châta hmo byuhpazy a pachâtuhpâ châ chi ta, na Awnanopa liata chakaona raizy cha hria awpata chyhsa hlupi na

khoh; rainanopazy hria awpa ta chyhsa nanopazy na awpa vâta alyna bie eima reih. Atahmâ, na Awnanopazy mohôh ta, deichhy awpata na awpa (zy), (moh zy.....s/o.... eima chahnaopa (penaw) he na Thlahpa Pathaihpa ta tobi la, sonazy piepa ta tha patlô (chyu) mah y. Na Awnanopa liata a (ma) tao awpazy cha palôhrupa adopa nata â-îpa hneina chôta tao lymâ awpa ta bao la, rairuna kyh liata chhao hnabeidy leipa ta nata chi leipa ta a (ma) y lymâ thei nawpa ta bao (chyu) mah y. Eima Beipa Zisu Krista vâta. Amen.

Biehneina Hlâna

Zawpi atyuh aw ei ta, Chahnaopazy cha Biehneina la awpa ta ama duah aw. Chakaotuhpa a ta Biehrai ku kârano ta patusapa ta he biehneina hlâna bie he a reih aw.

Pastor (moh), Mara Evangelical Church: Assembly ta Chahnaopa pastor zy ta chakao awpa biehneina a piepa zydua cha Awnanopa ryureina ta chakaona su a raopa maih liata Khazohpa bie ta Awnanopa pasapa nata ano khihnarah châta Awnanopa liata hria âbyuhpa maih cha hria thei awpa ta atanoh (date)..... noh ta biehneina ei cha pie.

Chakaona Rao-ao (stole) pathlaina

Chakaotuhpa chata Chahnao thiehpazy cha Chahnaopa pastor ama châ haw, tahpa ngiâna châta Chakaona Rao-ao râhpa tawhta asaipa lâta a pathlai pâ aw.

Phuahna nata Akaona Ku Hlâna

Atahmâ (moh) cha Khazohpa Bie nata MEC ta ahneipa Chahnaona Ryhpa hawhta atanoh Tari.... Noh ta Pastor châta Chahnaopa a châ haw, tahpa Paw nata Sawchapawpa nata Thlahpa Pathaihpa moh ta ei phuah.

Chatawhta Chakaotuhpa (zy) ta ABeipa Zisu Krista moh ta akaona ku chachâhlâ hlâ aw ei ta, “ABeipa ta byhnâ cha pie mawh sy” tah awpa a châ aw.

Hla sana

Daihti mopâpa ta zawpi a duapa ta hla sana a y aw.

Byhnâ Awna

Eima Beipa Zisu Krista ngiachhiena nata Khazohpa eima Paw kyhpachâna nata Thlahpa Pathaihpa akaona cha eima zydua hnohta atahmâ tawhta tlyzaw ta y mawh sy. Amen.

OTÔH BÔ THLAHCHHÂNA

Awnanopa ta achhyna o tlyma, Office tlyma, Quarters tlyma, O sâkha kha sa awpa a châ tita, Otôh bô Thlahchhâna hnei awpa a châ aw. Cha hawhta thlahchhâna hnei tita, he hawhta ahmâ awpa a châ aw.

1. Zawpi Hlasana
2. Biehrai reina nata thlahchhâna
3. Osa awpa kyh reina
4. Biehrai reina nata daihti a y khiah pasyuna chyupa rei awpa

ABeipa ta o a sa vei khihtala, a satuhpazy chata ama hriapasa thlâh thli. ABeipa ta khihpi a vaih vei khihtala, a vaihtuhpazy cha â hra thlâhthlie thlâh haw (Hlazy 127:1).

Chyhsa to ei hnohta a vy ta, ei bie thei ta a taopa maih cha, ahy a lyu tahpa ei cha pamosa aw ei; chyhsa o satuhpa a thuhpi chao ta, lôpanô chôta a bôna a paryhpa hawhpa cha a châ; ti a vaw lai nahta, tily chahra ngaitapa chhao chata su ta, a chalyu thei vei, a phapa ta a sapa vâta (Lk. 6:47-48).

5. Otôh bôna

Chakaotuhpa ta otôh cha a ku ta patu aw ta, he hawhta a reih aw.

Khazohpa rônahna châta he Otôh he Paw nata Sawchapawpa nata Thlahpa Pathaihpa Moh ta eima bô, Amen.

Lôo ta sapa (concrete building) tlyma châ sala, Otôh bôna khaoh liata leiraotlo (brick) so awpa a châ khihtala, leiraotlo he sâkha tawhta âryhpaohna hawhta sopa châ aw. Leiraotlo ama so nga haino ta, Chakaotuhpa ta he hawhta bie a reih aw.

Khazohpa rônahna châta he Otôh he Paw nata Sawchapawpa nata Thlahpa Pathaihpa Moh ta eima bô, Amen.

6. Thlahchhâna

Chakaotuhpa ta ano âryh a tahna hawhta thlahchhâna a hnei aw.

BO – 23

O THIEHPA HLÂNA / PAHYNA

Awnanopa ta a hneipa yna su (quarters) tlyma, o sâkha kha hlâna nata pahyna a y tita, he hawhta hmâ awpa a châ aw.

1. Zawpi Hlasana
2. Biehrari reina nata thlahchhâna
3. O hneituhpa tlyma, Osana liata maohphaona ahneituhpa tawhta biereina
4. Biehrari reina nata pasyuna chyupa rei awpa

ABeipa ta o a sa vei khihtala, a satuhpazy chata ama hriapasa thlâh thli. ABeipa ta khihpi a vaih vei khihtala, a vaihtuhpazy cha â hra thlâhthlie thlâh haw (Hlazy 127:1).

Eima hry liana heta o deita sa ta a hlâ mah leipa nama y ma? Nama y khihtala o lâta a di teh u, nama tah awpa a châ (Rc. 20:5).

He su liata thlahchhana he ei mo ta tawpâ aw na ta, ei nah ei pachôh aw. Cha liana chata ei moh chhâzaw ta a y thei nawpa ta ei o he rao na ta, ei pathaisa haw; cha liana chata ei mokhaoh nata ei pathipalôh chhâzaw ta a y ha aw (2 Tr. 7:15-16).

Unawhzy adyh ngaitapa ta pahrâ khohpa
he pha ta, â ngia ngaita kaw dia! Cha liana
chata ABeipa ta byhnâ awna bie pie ta, tlyzaw
ta hrona awpa cha! (Hlazy 133:1,3).

5. Hlâna thlahchhâna

*Chakaotuhpa ta a ku pazawhpa ta he hawhta a
reih aw.*

Khazohpa ta he o nata a chhôh liata a
pahrâpazy byhnâ a pie lymâ thei nawpa ta he O he
Paw nata Sawchapawpa nata Thlahpa Pathaihpa
mohta hlâpa ta eima pahy.

6. Thlahchhâna

*Chakaotuhpa ta ano ta â ryh a tahna hawhta
thlahchhâna a hnei aw.*

ACHHYNA O HLÂNA/PAHYNA

A. ACHHYNA O HMIA LIATA

Zawpi a pahmaohpakhypa ama ki nata Chakaotuhpa (Pastor) ta zawpi hmiakô liata Awnanopa Hyutuhpa nata Local Secretary lâta he ary liatapa a hiahri aw.

Chakaotuhpa:

1. Atanoh noh ta, (local church moh)... liata Achhyna o he, Khazohpa achhyna châta nata MEC Assembly hmobaoh (property) châta hlâ ta, pahy awpa eima chhuah. Chavâta local Hyutuhpa nata Secretary lâta bie hiahrina eima hnei aw.

Zawpi hmiakô liata Hyutuhpa nata Local Secretary cha paduasapa a châ aw.

2. He Achhyna O he Khazohpa châta nata MEC hmobaoh (property) châta nama hlâ hmeiseih ma?

Achhyna: Eima hlâ hmeiseih aw.

Ama hlâna cha châ liata ary lia hawhta moh rona hnei awpa a châ.

Chakaotuhpa:

Alyna bie reina chôta ochhi liana chata a ngia ula, reithaina chôta a dôhpa chhôh tlyhmia liana chata a ngia teh-u. Ano liata alyna bie reih ula, a moh cha reithai teh-u. ABEIPA cha pha tlôhta; a zawngiahna cha chhâzaw ta y aw ta, a ngiachhiena cha chhâ zydua taihta a y aw (Hla. 100:4-5).

Chakaotuhpa ta thlahchhâna hnei aw ta, chatawhta zawpi hlasana a y aw (âryhpaoh khiahta cha achhyna o cha ei thôh chahlôpa a châ aw). Chatawhta Chakaotuhpa ta he Khazohpa Biezy a reih aw.

Hy nâmo ku chhikao saih u, nama luh chôzy pasâh ula, nâmo ochhi hlôpazy saih u, a pasâh teh u! Chatanachata rônahna Beipa he a vaw ngia aw na. Cha rôhnana Beipa cha ahy e? Pheisaihzy ABEIPA, Ano tlai he rônahna Beipa cha a châ (Hla 24:9-10).

Chakaotuhpa ta:

Zawpi la a heihpa ta he bie he reih aw ta, pahyna ri chakie khaih nahta zawpi ta alyna ku chabaihpa ta achhyna-o cha a pahy awpa a châ.

He Achhyna-o he Khazohpa nata Mara Evangelical Church hmobaoh a châ tahpa phuah na ta, atahmâ Paw nata Sawchapawpa nata Thlahpa Pathaihpa moh ta ei pahy.

B. ACHHYNA O CHHÔH LIATA

Zawpi atyuna paryh khai tawhta hlasana y aw ta, Chakaotuhpa ta a ry liata Biehrai biezy he a zydua tlyma, a kho viapa sakha kha tlyma reina a hnei aw.

1. Maka 11:15-17
2. Zhn. 4:21-24
3. Ephesi 2:11-22

Khazohpa Bie nahthlie khai tawhta, Zawpi aduah khaipa châ aw ta, Chakaotuhpa ta ary liata biezy he reih aw ta, zawpi ta âraoh ngaitapa ta ama zi aw.

He o he, Paw nata Sawchapawpa nata Thlahpa Pathaihpa, eimâ chhyna nata akaona su châ awpa ta; Abeipa Zisu Krista Pachhahna Thatihpha chhona o châ awpa ta; Ngiapâtuhpazy ABeipa bie ta tha a patlôna nata thlah a palôhna o châ awpa ta; Siana nata kyhpachâna o châ awpa nata Khazohpa khihnarâh pa-ina nata pakawhna o châ awpata eima Khazohpa hnohta eima hlâ. Amen.

Zawpi a tyuh aw ei ta, Chakaotuhpa ta a chyusia ngaitapa ta thlahchhâna hnei aw. Chatawhta Apakhyna siezie hawhta pazao lymâ awpa a châ aw.

ACHHYNA-O HLÂNA FORM

_____ Local Church Achhyna-O he
Khazohpa achhyna châta hmâ awpa nata Mara
Evangelical Church: Assembly property châta
atanoh noh _____ (*Tari*) ta Paw nata
Sawchapawpa nata Thlahpa Pathaihpa moh ta,
Assembly lâta eima hlâ.

Local Secretary Hyutuhpa
_____ Local

AWNANOPA BIE NGIAPÂPAZY

**1. APOSTÔL ZY BIE NGIAPÂPA
(The Apostles' Creed)**

Khazohpa, Paw atotaotheipa, alei nata avâ taotuhpa cha ei ngiapâ.

A Sawchapaw matlupa Zisu Krista chhao ei ngiapâ. Ano cha Thlahpa Pathaihpa ta paphaosa ta, Laihsa kôpa Mari ta sa ta, Pawtia Pila ry liata pasa taopa ta y ta, khaipâpa ta y ta, thi ha ta, pabupa ta y ta, athihpa khi lâta zu ta, a noh thôhna noh ta a thihpa hry tawhtapa thyuheih ta, avâ lâta kaw kiah ta, chatanachata Khazohpa Paw, atotaotheipa ku chachâh lâta a tyuh ta, chatanachata a hrohpa nata a thihpa pachia awpa ta â zu aw.

Thlahpa Pathaihpa zy, Awnanopa pathaihpa moto a pahlypa zy, mopathaih penawh akaona zy, molei ngiaithaina zy, pôhpa thyuheihna zy, chhâzaw hrona chhao ei ngiapâ. Amen.

2. NICEA BIE NGIAPÂPA (The Nicean Creed)

Paw Khazohpa pakha atotaotheipa, alei, avâ nata hmo zydua, hmô theipa nata hmô thei leipa Taotuhpa cha ei ngiapâ.

Abeipa pakha Zisu Krista, Khazohpa Sawchapawpa hnei chhôhpa, khizaw zydua y hlâta Paw ta a sapa chhao ei ngiapâ; Ano cha Khazohpa tawhta Khazohpa, khaihpa tawhta khaihpa, Khazohpa hmeiseihpa tawhta Khazohpa hmeiseihpa, taopa châ leipata, a sa ta sapa, Paw nata châna sukha hmo zydua he Ano taopa, Ano cha keimo chyhsazy châta nata eima pachhahna châta ava tawhta za chô ta, Thlahpa Pathaihpa raihriapa ta Laihsa kôpa Mari liata sapa lâta a vaw lie ta, chyhsapa vaw châ ta, Pawtia Pila bie ta chyhsapazy eima châta khaipâpa ta y ta, pasa tao ta, chatawhcha pabupa ta y ta, a noh thôhna noh liata Khazohpa châbu reipa hawhta thyu heih ta, avâ lâ kiah ta, Paw chachâhlâ ta a tyuh ta, ahrohpa nata athihpa pachia awpa ta, rônah ngaitapa ta â zu heih aw. A khihnarâh cha chhâna noh hnei aw vei.

Thlahpa Pathaihpa, hrona pietuhpa nata hrona Beipa chhao ei ngiapâ; Ano cha Paw nata Sawchapawpa tawhta a vaw puapa, Paw nata Sawchapawpa zy nata hmaohkha ta achhy awpa

nata parônahsa awpa, hrohsopazy hmâpa ta bie a reituhpa cha a châ.

Apostôl zy paduapa Awnano pathaihpâ mo to a pahlypa chhao ei ngiapâ. Molei ngiahthai nawpa ta bătina sâkha ei pyh. Athihpa thyuheihna nata khizaw a vaw y heih awpa liata hrona cha ei hâ. Amen!

3. ATHANASIA BIE NGIAPÂPA (The Athanasian Creed)

Ahyrai pachhapa ta y a khohpa cha, ahropa zydua hlâta Awnanopa bie ngiapâpa hnei a byuh tua chai. Bie ngiapâpa cha mo to tlokhuh amâ py leipa khihtala chhâzaw ta ama leidia aw.

Khazohpa pakha, pathôh pakhapa nata pakha pathôhpa, Khazohpa pakha cha ama manôhna pachhah leipata nata pakha ta tao leipa ta eimâ chhy.

Khazohpa pakha, Paw, Sawchapawpa, Thlahpa Pathaihpâ, pathôh pakhapa, tlyzaw ta rônahna nata a beina kyh liata âkhopa; Paw a ypa hawhta Sawchapawpa cha a y; Sawchapawpa a ypa hawhta Thlahpa Pathaihpâ chhao a y. Paw cha taopa châ leipata Sawchapaw cha taopa châ leipata, Thlahpa Pathaihpâ cha taopa châ leipata,

Paw cha pahno paki thei leipa, Sawchapawpa cha pahno paki thei leipa, Thlahpa Pathaihpa cha pahno paki thei leipa a châ.

Paw cha tlyzawpa, Sawchapawpa cha tlyzawpa, Thlahpa Pathaihpa cha tlyzawpa; chahrasala tlyzawpa pathôh châ leipata, tlyzawpa pakha tiao a châ. Cha hawna hra chata taopa pathôh châ leipata pahno paki thei leipa pathôh châ hra leipata, taopa châ leipa pakha dei nata pahno paki thei leipa pakha dei tiao a châ. Paw cha hmo zydua ataotheituhpa a châ. Sawchapawpa cha hmo zydua ataotheituhpa a châ. Thlahpa Pathaihpa cha hmo zydua ataotheituhpa a châ. Chahrasala hmo zydua a taotheituhpa pathôh châ leipata, hmo zydua a taotheituhpa pakha dei tiao a châ.

Chatanachata Paw cha Khazohpa a châ, Sawchapawpa cha Khazohpa a châ, Thlahpa Pathaihpa cha Khazohpa a châ. Chahrasala Khazohpa pathôh châ leipata, Khazohpa pakha dei tiao a châ. Chahawna hra chata Paw cha Abeipa a châ, Sawchapawpa cha Abeipa a châ, Thlahpa Pathaihpa cha Abeipa a châ. Chahrasala Abeipa pathôh châ leipa ta, Abeipa pakha dei tiao a châ.

Paw cha taopa châ leipata, a pa-ysapa châ leipata, sapa châ hra vei. Sawchapawpa cha Paw cheingei tawhta a ypa, taopa châ leipata, pa-ysapa châ leipata, sapa tiao a châ. Thlahpa Pathaihpa

cha Paw nata Sawchapawpa cheingei tawhta a ypa, taopa châ leipata, pa-ysapa châ leipata, sapa châ hra leipa ta a pua chhyh lymâpa tlaô a châ.

Chatanachata Paw pakha, pathôh châ leipata Sawchapawpa pakha, pathôh châ leipata, Thlahpa Pathaihpa pakha, pathôh châ leipata he pathôh pakhapa he a y patluapa y vei, hnôhkhaw patluapa y hra vei.

Chavanachata pachhapa ta y a khohta cha Khazohpa pathôh-pakhapa cha a pyh ta, palâhâh awpa â byuh. Eima Beipa Zisu Krista sapa lâta awaw liena cha a dopata angiapâ awpa â byuh, angiapâna hmeiseihpa cha eima Beipa Zisu Krista Khazohpa Sawchapawpa cha Khazohpa nata chyhsapa a châ, tahpa a ngiapâna ta palâhah na a châ. Ano cha sapa kyh lâta leilô y hlâta Paw ta a sapa, anô Mari ta a sapa, chatanachata Khazohpa siapakipa nata chyhsapa siapakipa a châ. Khazohpa abeina kyh liata Paw â kho, chyhsa châna kyh liata Paw hlâta â hnai via.

Ano cha Khazohpa nata chyhsapa châ hrasala, pano châ leipata, Krista pakha dei tlaô a châ. Ano liata Khazohpa nata chyhsana a chakhia leipa ta a patypama hra vei.

Ano cha maniah pachha awpata pasa tao ta, athihpa khi lâta zu ta, anoh thôhna noh ta athipa hry tawhtapa thyu heih ta, avâ lâta kiah ta,

Khazohpa Paw atotaotheipa ku chachâh lâ ta a tyuh ta, ahrohpa nata athihpa pachiapa ta â zu aw.

Ano â vy heih tina cha moto pathyupa châ aw ei ta, ama hmotaopa chy hawhta a pachia aw. Chatawhcha hmopha a taopzy cha chhâzaw hrona liata a ngia aw eita, moleipazy deikua cha chhâzaw hrina su la ama sie aw.

BO – 26

AWNANOPA BIE ZYHPAZY

Mara Evangelical Church chata he a ry liata bie zyhpá tlâhpi-pazy he â pyh. Chavâta chakaotuhpa zydua chhao he bie zy-pa a pyhtuhpa ama châ awpa a châ. Protestant Awnanopazy chhao he biezy-pazy he atlah-pipa ta amâ pyh.

1. Biehra-i Parohpa nata Biehra-i Thiehpa he Khazohpa bie châ ta, he deita he ngiapâna nata hmotaopa thliena dopa a châ.
2. Khazohpa pakha deita y ta, Ano deita cha achhy awpa a châ. Ano cha Thlahpa, ano khota a vaw ypa, su to liata a ypa, thlahpa hropa zydua tawhta nata hmo hropa zydua tawhta ânana-pa a châ. A yzie liata chhâna a hnei leipa, tlyzawpa, ânano thei leipa a châ. Sona zy, hmotaotheina zy, pathaihna zy, adona zy, phana zy, bie hmeiseihpa zy, kyhpachâna zy Khazohpa a châ.
3. Khazohpa liana chata manôh pathôh - Paw nata Sawchapawpa nata Thlahpa Pathaihpa y ei ta,

ama pathôh ta Khazohpa pakha, châna miakha, hmotaotheina nata rôhna kyh liata âkhopa, tlyzaw ta y khohpa, tlyzaw ta a hroh khohpa nata tlyzaw ta âkhopa ama châ. Pakha pathôh liata, pathôh pakha liata tahpa heta Khazohpa châna bieparupa, pahnopaki thei leipa a châna a palâsa. Paw cha Khazohpa châ ta; Sawchapawpa cha Khazohpa châ ta; Thlahpa Pathaihpa cha Khazohpa châ ta; manôh chyu châ ei ta, châhrasala pathôh châ leipata, Khazohpa pakha a châ.

4. Khazohpa, alei, avâ nata a chhôh liata a ypa zydua Taotuhpa chata chyhsapa chanô nata chapaw, pahnona, adona nata pathaihna kyh liata Ano lyu awpata tao ta, chyhsa zydua he thyuna miakha, unawh sietanô sai ama châ.
5. Chyhsapa chata ano kho tlaita Khazohpa ryhpa cha parao ta, thailei châna nata raona liata â ngia haw ta, cha thailei châna, raona nata moleina tawhtapa cha chyhsazy pachha awpa nata tlyzaw hrona pie awpata Khazohpa, kyhpachâna a chhâ thai leipa chata, A Sawchapawpa hnei chhôhpa, Beipa Zisu Krista cha khizaw lâta vaw tuah ta; Ano liana chata Khazohpa cha sapa lata â vaw lie haw. Ano

zawzina ta chyhsazy pachhapa ama châ thei. Sawchapawpa cha chyhsa hmeiseihpa lâta a vaw lie ta, Khazohpa hmeiseihpa nata chyhsapa hmeiseihpa a vaw châ haw. Khazohpa hmeiseihpa nata chyhsapa hmeihseihpa châ lymâna chôta manôh pakha tlyzaw ta a vaw châ hawh. Thlahpa Pathaihpa hmotaotheina vâta laihsa pathaihpa Mari chata phaoh ta, sa ta, châhrasala moleina khapahmâ ta Ano liata y vei. Moleipazy châta Khazohpa ryhpa cha zyhpaki ta, Khazohpa ryhpa ta â hnawpa châ pakisa awpata nata chyhsazy Khazohpa nata paryhsa heih awpa ta atheihna hmeiseihpa nata pakipa châta a hlâ ta, Kraws liata thi ta, pabupa ta y ta, a noh thôhna noh ta athihpa hry tawhtapa thyu heih ta, Khazohpa chachâhlâ ta a kaw tyuh ta; cha liana chata a chyhsazy châta reipha cheih awpa ta a y. Chatawna chata a thipazy pathyu awpa nata khizaw pachha awpata â zu heih aw.

6. Thlahpa Pathaihpa, Paw nata Sawchapawpa tawhta a vaw puapa chata chyhsazy cha pachhana totuh awpata tao ta, ama moleinazy nata ama huponaziezy pahnopasia sapata, Krista pahnona kyh liata ama palôhrupa pakhaihsa ta, ama khonazy pahra ta, Zisu

Krista cha Beipa nata Pachhatuhpa ta, a py awpata pasyu ta, a py thei awpata bao ta, âmo liana chata siana theilâpa zydua cha a hriapapua pa ei.

7. Khazohpa ta Krista liana chata chyhsa zydua hnohta pachhana a piepa cha a saipa ta pie ta; Zisu angiapâna ta ama moleinazy ro awpa nata Zisu Krista cha ama Beipa nata Pachhatuhpa châta apy awpa ta, Ano a mopâna chôta Khazohpa khohpa taopa ta areisipa ta nata pathaih ngaitapa ta y awpata bie pie ta; Krista cha a ngiapâpa ta, Ano bie a zytuhpazy cha pachhapa ta y ei ta, molei ngiahthaina zy, Khazohpa saw châna zy, thai pachâsana zy, amo liata Thlahpa Pathaihpa a pahrapa vâta pathaisana zy nata chhâzaw rônahnazy ama to. Cha ngiapâtuhpazy chata atahmâ eima hro chhoh cheingei heta pachha châ a pahnopasiana lychhi ngaitapa cha ama to thei. Thlahpa Pathaihpa chata ngiachhiena raihria ta, hmobao ta hmâpa hnei tyh ta, a hmâ khoh via pachaipazy cha Khazohpa châbu biezy, Hmo ânapa (sacrament) zy, thlahchhânazy he a châ.
8. Krista ta hmâ ânapa (sacrament) a taopazy cha Bâtina nata Abeipa Zâpati zy he a châ. Bâtina

9. Ngiapatuhpa zydua tao awpa cha Awnanopa sahlaopazapakhya zy, Krista Sacrament nata hmo ânapa hropazy mohôh phana zy, a ryhpa zyhna zy, thlahchhâ lymâna zy, Abeipanoh cha –y ta pathaisana zy, Ano achhy awpata apakhyna zy, A bie chhopa nahthliena zy, byhnâ ama daonazie lyma hawhta pie hrina zy, âmo hry liata nata chyhsa zydua hnohta Krista nôchâ palâsana zy, khizaw pôhpalôhpa liata Krista râh pakawh awpata teina zy, rônah ngaitapa ta â vy heihna daihti hâpa zy he a châ.
10. Nohchhâna liana chata, athipazy pathyu heihna y aw ta, Krista dyuchhai hmiakô liata chyhsa a vaw lâ aw ei ta, ama hro chhoh liata ama hmotaonazie lymâ hawhta a chhiepa tlyma, a phapa tlyma, ama hmô aw. Ngiapa leipazy nata moleipazy chata thailei châpa ta ama molei hrina to aw ei ta, Krista a ngiapâ ta a bie a zytuhpazy deikua cha thai pachâsapa ta y aw eita, chhâzaw rônahna nata alyna liata ama ngia aw.

AWNANOPA HRO AVAONA RYHPAZY

Eima awnanopa siena, chhihthana nata hrozie awpa asiapa ta palâsa nawpa ta, Khazohpa Biehrai Pathaihpa hmâpa ta he Awnanopa Hro avaona ryhpa he taopa a châ. Chavâta Awnanopa chyhsa dopa châ lymâ thei nawpa ta Khazohpa bie nata a ryhpa zyh lymâ awpa a châ.

Awnanopa liata a hlao awpazy

Chyhsa ahyrai ta Awnanopa liata â ngia awpata hiah sala, achatlie kawpata aly ta a py awpa hlata, a ry liata Khazohpa bie mopâpa ta a chado kawpa ta pasia tua awpa a châ.

1. Thlahpa Pathaihpa raihriana zawzi ta moleipa ama châpa a pahnopa, ama moleina papeisa ta, pachârôh ta, ngiapâna ta pachhana a tluapa chyhsa ama châ awpa a châ (Ht. 2:37, 16:31).
2. Pachhana cha Krista lia deita ta tluapa ta, Pachhatuh rônahpa nata lyuhchapa pha pakipa hawhta apyhpa chyhsa a châ awpa a châ (Phi. 3:7-9; 1 Tim. 2:5; 6; Heb. 8:6).
3. Krista nata a siana liata nodi ta, dâh a phipa a châ awpa a châ; cha kyh liata lathlôh dopa a

châpa Khazohpa bie nathliepa zy, Thâtihpha ryhpa zy, hmaohkha ta Khazohpa achhyna zy nata thlahchhâpa zy ama papeisa awpa a châ (Mt. 5:6; Heb.10:25; Rm. 10:17; Eph. 6:18).

4. Krizyhpa Bie ngiapâpa a chakhiapa pachâna/ngiapâna hropa ama pyh awpa châ vei. Paw nata Sawchapawpa nata Thlahpa Pathaihpa kyh nata bie ngiapâpa peimawh hropazy he ama paphasai awpa châ leipa ta, khâchâ a pyhpa chyhsa ama châ awpa a châ (Zam. 1:6, 8; Heb. 3:12-19).
5. Awnanopa cha Krista Awnanopa, Krista ta a bôpa, ‘Thâtihpha bie hmeihsehpa tôh nata â pahniehna’ châ cheingei pata apypa ama châ awpa a châ (Mt. 16: 18; 2 Tim. 3:15).

Krizyhpa Hro - Zyhna kyh lâta

1. Khazohpa achhy awpa he Krizyhpazy tao awpa peimawh chaipa nata hmiatua chaipa cha ta, ama diathla awpa châ leipata, ama papeisa awpa a châ (Mk. 12:29, 30; Zh.4:23, 24).
2. Krizyhpa cha Abeipanoh a cha y awpa a châ. Khazohpa achhy ta, a bie nahthlie nawpata nata thlahpa châta a phahnai awpa maih tao nawpata hmâ awpa a châ (Pu. 20:8-11; Ht.20:7; Bp.1:10).

3. Khazohpa bie a chakhiapa nata Krizyhpapa palôhrupa a parao theipa maih - zohna hmotaopa zy, saiso puapa zy, lâpa zy, apalya-uasana doleipa zydua siesai awpa a châ (Rm.12; II Kaw 6:17; Eph. 5:11:12).
4. Apatlana nata sihryhna kyh, hmo moleipa khaparai ama tao awpa châ leipa ta, moleina hawhta a lâpa nata moleina lâta maniah a chhi theipa hmo zydua chhao ama khôkhâ awpa a châ (I Kaw. 6:9,10; Eph. 5:3-5).
5. Atheihna hmo kheihawhparai nata pachaona hmozy ama tao awpa châ leipa ta, dyu zy, kulâ mopa zy nata he hawhpa kyh la hmo rai rai cha khizawpa theihthaipa hruapa hawhta a châpa vâta tao lei awpa a châ. Kyh to liata Khazohpa ama ngiapâ awpa a châ (Th. 19:31; Rc.11: 10, 11, Pu. 20:3; Lk. 4:8).
6. Khazohpa Bie hawh tlaita, eima ngiapâna palôhrupa a paviasa theipa maih - nothlahpa achhyna hmo zy, khizawpa chyhsa noh nata thla cha-ypa zy, hâta chhôn liata noh pha via eipa hneipa zy ama py awpa châ vei. Khizaw chyhsa ta pathaih leipata amâ pypa pachâna hrupa zydua siesai awpa a châ. He hawhpa zydua he Khazohpa hmeiseihpa nata khizaw khazoh apyh pakaona a châ (Lk. 4:8; Ryurei 6:25-32).

7. Khazohpa khihnarâh châta a peimawhpa thyunazy he ama papeimawhsa awpa a châ, Krista a pakhykhei leipa cha a papaipa a châ (Th. 24:28-33; Mt. 12:30).

Krizyhma Hro - Khitlâh lâta

1. Chyhsa ta ama chô liata taopa ama khoh awpa hawhta chyhsa chô liata tao ama chhuah awpa a châ (Mt. 7:12; Lk.10:20-37).
2. Chyhsapa nata py châta pha awpa achâhkheina kyh liata theina hawhta a taopa nata a thyupa (a piepa) châ achhuah awpa a châ. Chyhsa zydua chô liata hmophapa tao awpa châ ta, ngiapâ na chhôngkha liatapa chyhsa chô liata ama tao pachai awpa a châ (Kal. 6:10; Eph. 2:10).
3. Pachânazy, thlienazy, khopathliahnazy, a sia ngaitapata pado awpa a châ (Th. 19:35; Biso 20:10)
4. Hmo paruna, avyuhna nata karâ hneina kyh vâta chyhsa rie patheipazy, sôh kyh liata pachaona nata akhainazy he tao lei awpa a châ. Ahryuna nata panaopapana puapazy, chyhsapa a paraotuhpa châta tao lei awpa a châ (Eph. 4:28; 5:5; Zb. 15:34; 1 Sam. 8:3; Amo. 5:12).
5. Abâhpa thôna kyh liata ngâchhih awpa a châ. A daihti ta liata ado ngaitapa ta thô a chhua

leipa khiahta cha khâpahmâh dyu pacheisa awpa châ vei. Sôh paliena kyh a châ leipa, tlâh lei chieh leina nata riethei sipasapazy chô liata apôhpa lapa ta dyu pacheisa awpa chhao châ vei (Hla. 37:21; Pua. 22:25).

6. Sôhdaopa ta sôh hmâna kyh liata ngâ a chhih awpa a châ. Achado lei ngaitapa ta sôh hmâ khai hapata, chyhsa hropa sôh sia lei ngaitapa ta abâhpa he hmo molei ngaitapa a châ (Lk. 16:2).
7. Leibâh he a bâhtuhpa châpa hlâta a pietuhpa châpa tlaô a pha viana zie pahno ta, chyhsa liata leibâh a bâh lei awpa achhuah cheingei awpa a châ. Leibâh a thô thei ta to leipa chô liata cha zaw angia awpa a châ (Mt. 18:23-30).
8. Bietaihna nata Biehraihna peimawhpazy parao awpa châ vei; theina hawhta a patlôpa chyhsa tlaô châ awpa a châ. Khazohpa moh ta bie a taihpa chhochhi cha Khazohpa mosiapa ta a pahnokheipa a châpa vâta ama parao awpa châ vei (Pua. 20:7; Biech. 5:4,5; Rm. 1:31).
9. Hmo chaleina nata zuana kyh liata ngâ a chhih awpa a châ; chalei awpa thata reipachhie awpa châ leipata, zua awpa rei papha tu awpa châ hra vei. A pahno leipazy dô thlâhâ awpa châ leipata, amâ dopa nata daoh liata zuana pahnona zie hawhta â daihpa rakha ta amâ

hawhta, pie awpa a châ (Th. 25: 14-17; Bies. 20:10,14).

10. Pakah tawhta bie a puapa cha a pathaih awpa a châ. Âdo nata ângiapa rakha ta bie rei awpa a châ. Chhiesapa zy, seisâpa zy, bie chhie reipa zy, a byuh leipata bie pualeipa reipazy hmâ awpa châ vei. Chyhsa reipachhiena nata thâchhie reina chhao hmâ awpa châ vei (Eph. 5:3-4; Mt. 12:37).
11. Alaathaona taihta bie-ei chahrâ awpa châ vei. Noh reipata nata chhie a sakhâhpa haw tlaita biereipazy hmâ awpa châ vei. Asia ngaitapa nata palâ ngaitapa ta ama pachyuna tlaõ rei awpa a châ (1Tim. 6:3-5).
12. Chyhsa zydua nata a ryhpata y achhuah awpa châ ta, vaih nata unawhpazy khâ a hao ta achhyh thai leipa nata parao a khohpa chyhsa cha Khazohpa khinarâh chyhsa châ vei (Rm. 12:18; 1Kaw 6:9).

Krizyhpâ Hro - Keimo liata

1. Chyhsa aparao theipa nata Khazohpa chakaona liata pasai leipa nie nata do zy a taih awpa a châ (Lk. 21:34, 1Kaw 6:10).
2. Mo to eima puhna chyuta, pathaih ngaitapa nata sia ngaitapa ta nata mongiapa ta atobi awpa a châ. Apalai nawpa nata moleina lâta

maniah a chhieh theipa atobina kyh liata asohsi awpa a châ. Atobina he Biehrai thiehpa ta Krizyha hro hry liata a peimawh kawpata a reipa a châ (1Pity. 3:2-6;1Tim. 2:10).

3. Mo to ta raihria liata ngâ amâ chhieh awpa a châ. Hria theina nata hriana daihti ama hneipa pahleipa ta, ama thathi awpa châ leipa ta, cha hawhpa chyhsa cha Abeipa ta thai lei a pachâsa tahpa pahno awpa a châ (Mt. 25:26-30).

Krizyha Hro - Chhôhkha lâta

1. Chhôhkha ryurei tlâhtlana ama pasia awpa châ ta, ama sawzy Abeipa pahnona nata china liata ama chhiehtha awpa a châ. Chhôhkha apakhyna ama theina hawhta hnei awpa a châ. Chata leipa khiahtala sawzy Abeipa bie liata chhiehthana rypaohpa hnei aw veih ei (1Tim 3: 4; Eph. 6:4).
2. Khazohpa bie ta chhôhkhana kyh nanopa a reipazy he a sia ngaitapa ta zyh awpa a châ (Eph. 5:22-6:4).
 - (a) Nôpi nôvah kyh liata
 - (b) Nôpaw nata sawzy kyh liata
 - (c) Hyutuhpa nata chakaotuhpazy kyh liata
3. Krizyh leipa nata a hnei awpa hlata cha zyhna âlyupa nata a hnei awpa a pha via.

4. Zyhna alyupa liata chhao Krizyhpá biezyhpá a paphasaipa nata ngiapâna ânanopa chyhsa nata a hnei awpa pha tu vei. Ahnei hlâta nata a hnei nohta khizaw ryhpá pha leipazy ama chhih awpa châ vei; a hnei awpa maihta ama thlahpa phana ama pachâ awpa a châ (II Kaw. 6:14).
5. Awnanopa chyhsazy cha Awnanopa ryhpá leipa hawhta amâ hnei awpa châ leipata, cha hawhta a hneipazy cha alykhei awpa chhao châ leipata, a ngia vei (II Kaw. 6:14-15).

Krizyhpá Hro – Nôvah lâta

1. Vahpa saih u, nama lapinôzy kyh pachâ teh-u, Krista Awnanopa sahlaio kyhpachâ ta, ama vyuhpa ta ano âpiepa hawhna kha ta. Chahawhna hra chata vahpa chata ano pôhpa hawhta a lapinô cha kyh a pachâ awpa a châ. Ano lapinô kyh a pachâtuhpá cha anosasyh ta kyh a pachâpa a châ. Ahyhmâ ta ano sapa a hao beih tlôh leipa ta. Chavanachata chapaw ta a nô nata a paw sisaipa ta a lapinô patu aw ta, chatawcha ama pano ta sapa miakha ama vaw châ ha aw. Chavâta amo kyh a pachâpa hawhta ama lapinô kyh pachâ chyhu mawh sy (Eph. 5:25-33).
2. Avahpa saih u, nama lapinôzy kyh pachâ ula, amo liata a hrâhnao khah u (Kaol. 3:19).

3. Nâmo vahpa saih u, chanô he hmobaoh rao nao viapa ama châpa vâta nata ngiachhiena hrona a tolatuhpa ama châpa vâta palyupalihna chôta pahnona lyma hawhta nama lapinôzy hnohta y teh-u, nama thlahchhânazy pakhâpa ta a y lei awpa ta (I Pity 3:7).
4. Lapinô chhaota a vahpa za awpa ta a chado mawh sy. Lapinô saih u, ABeipa lâta nama ngiaripa hawhna heta nama vahpa lâta angiarì teh-u. Krista cha ano tlai pôhpa Pachhatuhpa châpa ta Awnanopa sahlao luh a châpa hawhna hra heta, vahpa cha lapinô luh châ tlôh ta. Awnanopa sahlao Krista lâta amâ ngiaripa hawhna hra heta lapinôzy cha ato liata ama vahpa lâta a ngiarì ei se (Eph. 5:33b; 22-24).
5. Lapinô saih u, nama vahpazy rei sai ta y teh-u. Chatanachata nama hry ta ahyrai ta Khazohpa bie cha zyh vei hrasala, bie leipa ta ama lapinôzy yzie ta pahniepa ta ama y thei aw. China chôta namâ yzie pathaihpa mona chô ta, nama tobina cha khôtho lâ atobina saphiehpazy, ngôh pachhìh a aopazy, chysia ta atobipazy châ leipa ta, pathipalôh liata chyhsapa pachâna zie cha palôhrupa reisipa nata nônai chysia rao thei leipa ta atobipa tlaô châ se, cha cha Khazohpa mohmô ta a sôh ngaitapa a châ. Chahawna hra chata hlâno ta

chanô pathaihpá Khazohpa ngiapâtuhpazy chhao khata ama vahpa rei sai ta ypa ta a tobi tyh tlôh ei ta (I Pity 3:1-6).

Krizyhpá Hro – Sawhkhâ lâta

1. Khazohpa bie hawhta ryureituhpa nata ryureituhpazy reipachhie awpa châ vei. Sawhkhâ luh chaipa nata a ry liatazy rei a ngiah ta, za awpa a châ (II Pity 2:10-11: Rom 13:1-7).
2. Râh chyhsa phapa châ awpa a châ. Sawhkha ta akheipa lei mâ zy, chhiechei awpa zy a sia ngaitapa ta pie awpa a châ (Rm.13:4).
3. Sawhkhâ ryhpa ta chalei ta zua awpa a pasai leipa cha, a ru lâta tao awpa châ vei.
4. Unawh likawh liata bie buapa cha ryureituhpa latâ tlôkhei leipata, Awnanopa ta unawh bie hawhta ama pachiapa cha a py theipa châ sala a pha chaipa a châ.

Krizyhpá Hro- Awnanopa Avaona

1. Chyhsa ta a unawhpa moleipa hmô sala, Krista pachuna bie hawhta a pasipa-aopa a pha. Pasipa-ao thei leipa a châ khiachtachâ Awnanopa ryhpa hawhta chhoreipa a châ aw (Mt. 18:15-17).
2. Krizyhpá a leih eisala, Awnanopa sahlaota a chado ngaitapa ta nata a châhkhei hlei hnei

leipata ama hiahri pasia awpa a châ. Bie ama pathlu hlâta pahnokheituhpazy bie a sia ngaitapa ta pachâ mawh ei sy. Awnanopa chhoreina pataosa awpa a châ khihtacha, ngiachhiena hneina chôta chhorei awpa a châ (Rc. 19:15-19; Kal 6:1).

3. Chhorei awpa taihta moleipa ataopa cha, a ro nawpata nata Awnanopa liata a chakao haipazy vai nawpata chhorei awpa a châ. A ro tita apy heih awpa a châ. A py heihpa a châ hlâta Awnanopa chakaona liata tovyuh khâpa hmâhta pahneisa awpa châ vei. A ro nata ro lei mo nawpa cha Assembly bie hmâ haipa hawta a châ aw (I Kaw. 5:1-5).
4. Awnanopa sahlao hryta a eina nata aryh leina vaw pua ha sala, Awnanopa sahlao ta pachâ ei sala, a thei khihtacha bie chhâna tao ei sala, ama tao thei leipa khihta cha Awnanopa ryureina asah viapa lata tlôkheipa châ mawh sy (Pua. 18:21-27).
5. Awnanopa ta Khazohpa achhy awpata pakhyina a hneipazy cha a sia ngaitapa nata pha ngaitapa ta, sahlao zydua a thôhkhei nawpata a rao awpa a châ. Khazohpa achhyina hla sapazy, Khazohpa bie reipa zy, thlahchhâpa zy cha chyhsa to thlahpa chhihtha nawpata tao awpa a châ. Cha khai tawhna chata pasyuna zy,

chhoreihna zy, thlahpalôhna zy, Khazohpa bie liata pahno awpa peimawhpa zy cha reipa châ mawh sy. Pakhyna cha a pasitu awpa châ leipata, a thôhkhei chy thei nawpa châ mawh sy.

6. Khazohpa achhy pakhynazy cha Awnanopa ta a tlypa, pakhypi ta a chahnaopa chyhsa ta ama chhihtha awpa a châ.
7. Awnanopa machâ châ awpa ta cha Khazohpa a pachâpa nata Awnanopa biezyhpa a-i ngaitapa ta a patupa chyhsa a châ leipa khihtala, a tly awpa châ vei. Thatihpha bu palihpa zy nata chhoreina ryhpazy, hmp anapa (sacrament) biezy a pahnopasiapa chyhsa a châ awpa a châ.
